

萬 有 文 庫

第二集七百種

王 雲 五 主 編

讀 史 方 輿 紀 要

(四十三)

顧 祖 禹 輯 著

商 務 印 書 館 發 行

讀史與紀要

(四十三)

顧祖禹輯著

國學基本叢書

讀史方輿紀要

卷九十八

福建四

汀州府。

東至延平府五百二十里。東北至建寧府七百三十里。東南至漳州府六百三十里。南至廣東潮州府六百六十里。西至江西贛州府四十里。西北至江西石城縣百九十里。北至邵武府五百五十里。自府治至布政司九百七十五里。至京師五千二

百二十

六里。

禹貢揚州地。周閩越地。秦屬閩中郡。漢屬會稽郡。三國吳屬建安郡。晉屬晉安郡。宋齊梁因之。陳屬閩州。隋屬泉州。大業初。屬建安郡。唐爲福州地。開元二十四年。置汀州。

唐書。是年開福。擿二州三峒置州。以長汀溪爲名。治新羅。大歷四年。徙治白石。

天

寶初。曰臨汀郡。乾元初。復曰汀州。五代時。王閩仍曰汀州。南唐因之。宋亦曰汀州。元爲汀州路。明朝曰汀州府。領縣八。

府南通湖廣。北達江右。山谷斗絕。稱爲輿壤。自唐始置郡。而擾馴未至。王潮入閩。則有事於汀州。宋室

南遷而汀州亦多叛亂。明朝正德中，尤溪賊爲亂，南贛撫臣王守仁討平之。豈非以崇山複嶺，旁達諸境，不逞之徒，易爲淵藪，童牛之牯，不可已耶。

長汀縣

附郭晉新羅縣地，屬晉安郡。唐開元中，於新羅故城東置長汀縣爲州。治大歷中，遷白石鄉。宋治平中，遷衣錦鄉，卽今治也。編戶五十一里。

新羅城

在府東南。晉置新羅縣，宋廢。志云：在今漳州府龍巖縣界。一云在上杭東北五十里，悞。唐開元後，徙縣治長汀村。在上杭北十五里。一云去今府城二百二十里，亦悞。旣又遷縣治東坊口，在今府東北五里，今名舊州城。大歷中，遷白石村。郡志謂大

歷四年，徙東坊口。後十年，徙白石鄉。宋遷今治，卽唐白石鄉矣。去舊治一、二里，地勢平夷，方數十里，而臥龍山突起平地中，府城半壁高掛，其巔鄞江繞於左，西溪抱於右，二水合流，繞出丁位，南走潮海，西下豫章，爲形勝之地。郡城相傳，唐大歷中築。宋治平五年，增拓，周五里有奇，環城爲濠，紹興中及隆興初，皆嘗修築。紹熙間，議易土城，鑿以磚石，訖於嘉熙，功未及就。元時，城益頽廢。明朝洪武四年，復因舊址修築。嘉靖五年，增修。北據臥龍山，南臨南溪，舊有門六，今五。城周六里有奇。

臥龍山

郡治後，府主山也。偃臥如龍。志云：府城四面皆平田，就中特起一山，高數十丈，廣五六里，北面峭壁矗起，其南派爲九支，形如九龍，蜿蜒蟠曲。一名九龍山，又名無境山。山之左支爲橫岡嶺，右支爲西峯，俯臨津門。又東山在郡治東，臥龍山首起於

此。○南山在府南三里，屹然如屏，巔爲朝斗巖，綠石捫蘿而上，俯視城市，盡歸目睫。山之東接拜相山，俯揖臥龍，如人拜相。山隈有霹靂巖。宋元祐間，迅雷震開，遂成巖洞。府南四里有圓珠山，當鄞江西溪，二水合流之口，形如珠圓，一名龍珠山，俗呼寶珠峯。

鷄籠山

府北五十里，高十五里，山形圓聳，上凌霄漢，又翠峯山，在府東北六十里，壁立千仞，煙雲出沒，惟天色晴霽，亭午方見其頂。○七寶山在府西山下，舊有上寶場，宋置探銀錫於此。後廢。通志：場在縣治西，又佛祖峯，在縣西三十里，俗名九礫，轉北二

里許。樹木陰翳。石磴崎嶇。爲絕勝處。

雙峯。

府東南二百里。峯巒雙聳。插入雲霄。○新路嶺在府西六十里。一作新樂嶺。接江西瑞金縣界。負水出焉。志云。嶺峭險壁立。砂礫崎嶇。行者病焉。嶺背卽隸江西。此天所以限閩中也。又牛嶺在縣西二十里。道出瑞金縣。其相接者曰白頭嶺。以常冒白雲名。

鄞江。

在府城東。亦曰正溪。又名大溪。或謂之左溪。源出寧化縣界。流經府東北湘洪峽。又南至府東莊嶺。滙爲潭。分流爲二。又南至高灘角。復合爲一。南流經上杭縣。達潮州府大埔縣。會三河水入海。亦謂之汀水。志云。天下之水皆東。惟汀水獨南。南。丁位也。以水合丁爲文。又有東溪。出翠峯山下。有鄞坑水流合焉。至張家陂與正溪合。並爲鄞江之上流。高忠憲曰。記云。汀水之源在北。水俱南流。勢如壁立。過大姑絕險處。舟下一灘。則入白浪中。裹而復出。直至峯頭趨陸。則抵潮州矣。

西溪。

府城西。源出府西北。地名大原。流經杉嶺。亦曰南拔溪。宋治平中。築城塹濠。砌石陂。引水入焉。下流分二派。皆入於正溪。又南溪在府城南。溪源不一。引流而東。至南口。亦會于正溪。又北溪在府城北。源出西北之橫坑。亦謂之橫溪。東流合正溪。寰宇記。臨汀大溪有四。曰東溪。曰西溪。曰南拔溪。曰橫溪。至府南高灘角。合流爲一。蓋以南溪爲南拔溪也。府東又有梓步小湖。等溪。亦流入正溪。

寅湖。

府東二里。以方位名。周百步。中有小山。水溢不沒。又辛湖。在府西一里。周七十步。亦以方位名也。○麻潭在府東南。衆流皆會於此。山勢盤互。過此折爲九曲。又礫角在府東。高巖湍怒。漑田甚廣。又東有礫頭。峭壁數十仞。瀑聲如雷。亦有漑漑之利。志云。府南有五百灘。自汀抵湖。灘險有五百之數。今漁梁。鷓鴣。蛇王。九曲。王屋。紗帽。諸灘是也。

古城寨

府西四十里。五代時王延政築此城以備江南兵。宋因置寨爲戍守處。亦曰古城里。志云：舊城在府西南何田市。宋紹興中遷今所。明初置古城營巡司。又西至江西瑞金縣五十里。○屯駐軍營在府南三里。宋建炎中羣寇擾亂遣軍討捕。營駐於此。紹興十四年始創築。元廢。又何田市營在府西南五十里。宋時爲商旅輳集處。嘉定間創營以彈壓之。今廢。志云：府北有汀關宋置。景炎二年元兵破汀關。文天祥欲據城拒敵。汀守黃去疾有異志。天祥乃移軍漳州是也。今湮。

臨汀驛

在府治東。宋淳熙中建。至今因之。府東七十里有館前驛。元爲館前站。明初改驛。又三洲驛在府西九十里。本三洲舖。成化十八年建。三洲公館後改驛。○拔口場在府西南八十里。宋置稅務於此。又合同場在府治東。宋置尋權鹽稅於此。後皆廢。

九礫隘

府西北三十里。志云：府東五十餘里有大息鎮。明二隘。東南八十餘里有桃陽隘。府南百餘里有黃峯隘。西南九十里。有長橋隘。五十餘里有分水龜龍二隘。與古城九礫爲九隘。皆爲戍守要地。而黃峯與古城尤爲險峻云。

寧化縣

府東北百八十里。西至江西石城縣九十里。西北至江西廣昌縣百九十里。北至邵武府建寧縣二百里。本建州沙縣地。唐開元二十四年開山峒置黃連縣。屬汀州。天寶元年改今名。編戶五十一里。

黃連城

縣東五里。本黃連鎮。唐置黃連縣於此。以地產黃連而名。尋曰寧化。後唐同光元年王閔遷縣治於鎮。四竹篾窩。北負翠華。南臨大溪。卽今治也。縣境山峻水急。峯巒萬疊。至縣治則四圍平坦。形如大釜。旁挹嶂岫。下瞰溪湖。稱爲形勝。縣城相傳始

遷時築。亦曰寧陽城。周不及一里。宋端平間展拓。周二里有奇。寶祐二年圯於水。開慶初嘗議修築。不果。明朝正統中屢被寇患。正德五年始築土城。九年毀。以磚石。周四里有奇。

翠華山

縣北二里。其山四時蒼翠。縣主山也。又鳳凰山在縣北三十里。崇岡峻壠。蜿蜒不絕。形如鳳翅。其地有靈隱洞。亦名洞源巖。又北曰陶峯山。峯巒峻竦。四面壁立。縣北六十里。又有牙梳山。以形似名。險峻扼塞。嘯聚所憑。○南山在縣西南十里。三峯

相連。其中一峯特起。爲邑之望。流水環遶其下。

苦竹嶺

縣北九十里。嶺甚高。多產苦竹。常有雲氣蒙其上。又北有南橋嶺。以高拱如橋而名。志云。縣東北百里有城門嶂。山勢卓立。如屏。元季寇亂。邑民多避兵於此。○西巖在縣東北五十里。登山梯而上。石筍屹立如門。中可坐千人。泉石殊勝。有石室數處。皆幽異不一。其傍為東巖。亦有數石室。爭奇競秀。志云。縣南六十里有烏路。峽兩岸壁立。水勢灑洄。深不可測。又危石在縣北六十里。突然一峯。四壁陡絕。

黃連洞

在縣東。亦曰黃連鎮。本名連城洞。唐置冶處。乾寧元年。王潮據閩。黃連洞蠻圍汀州。潮遣將李承勳擊之。追破之於漿水口。閩地略定。漿水見延平府將樂縣。胡氏曰。黃連洞即潭飛滌。似悞。又靈隱洞。在縣北百里。一名洞源巖。洞前重岡疊巘。小澗

橫截巖
石奇勝

大溪

在縣城南。源分六派。其正西自贛之石城縣。壑嶺來會。西南自長汀縣。界狐棲嶺來會。西北自石城縣。界長放坑來會。此大溪之上流也。其東北自建寧縣。界壘田嶺來會。正北自苦竹嶺。至縣北三十里之馬家渡來會。正東自熱水窰頭。至縣東四十里。

劍潭來會。至縣東之東渡。與上流三派合為一溪。復折而東。至清流縣。又東會劍江水。抵福州入海。志云。大溪支流西南入長汀縣。而為正溪。一云溪源出縣北五十里石洞中。潰湧而出。名萬玉泉。流為小澗。澗田數千畝。又引而南。為正溪之上源。

蛟湖

縣北六十里。深不可測。又有柘湖。在縣東北。其水四時不涸。澗田甚薄。西去蛟湖密邇。又有羊鴉湖。在柘湖側。亦有灌溉之利。○龍門潭在縣南。水深莫測。引流而東。亦曰龍津。有龍門橋跨其上。流會於大溪。又神頭潭。在縣西南數里。神頭嶺下。澗深清

澈。縣東又有赤岡潭。皆引流入大溪。

潭飛滌

在縣南鄉。重岡復嶺。環布森列。登陟極難。滌居其上。坦然寬平。山環水合。有田有池。草茂林深。易於藏聚。宋紹定間。汀邵賊晏頭陀作亂。攻陷城邑。北犯建寧。監軍劉純等擊破其潭飛滌。又諭降連城七十二砦。賊遂平。一統志。宋平賊後。置南平寨。

於此爲戍守要地。又龍潭潦。在縣北三十里。相傳有龍潛焉。時至漲溢。縣西十餘里。又有雷鳴潦。以聲如雷。轟而名。○七孤龍在縣南。北去烏路峽十五里。石峻路險。怒濤奔湍。透迤七曲。舟行甚艱。蓋卽正溪所經矣。

安遠砦

縣北百里。北至邵武府建寧縣八十里。舊名下土寨。宋慶元中置。元因之。有巡司戍守。明朝洪武初改今名。又南平砦。在縣南。近潭飛潦。宋紹定六年。移黃土寨置於此。又北安砦。在縣東北七十里。宋紹定六年。移苦竹砦置於此。今皆廢。○金錢隘。

在縣東。入清流縣界。又石溪隘。在縣北。路出建寧。廣昌二縣。其相近者爲紫雲。巖塘。草橋等隘。

又留西隘。在縣西。通石城縣。縣南又有木馬。竹篙二隘。通長汀及連城縣界。皆爲戍守要地。

石牛驛

縣南七十里。以傍有石牛而名。宋置。至今因之。輿程記。由清流縣九龍驛舟行至驛九十里。又西南六十里。而達長汀縣界之館前驛。往來必經之道也。

上杭縣

府南百九十里。東南至漳州府龍巖縣百五十里。南至永定縣百十五里。西南至廣東程鄉縣三百十里。西至武平縣百里。本龍巖縣地。唐大歷四年。置上杭場。宋淳化五年。升爲上杭縣。割長汀縣南境隸焉。屬汀州。今編戶四十五里。

上杭舊城

志云。唐析龍巖縣胡雷下保置上杭場。其地在今永定縣東四十餘里。南唐保大十三年。徙場於藝梓保。在今永定縣東北六十里。宋升爲縣。至道二年。徙治鼈沙。在今縣東北三十里。地名白沙里。舊曰鼈沙里。咸平二年。又徙縣於語口市。東

去鼈沙不及一里。天聖五年。復徙鍾瘵場。在今縣西北二十里。其地坑冶大興。商旅輻輳。乾道三年。又徙郭坊。卽今縣治。有城。相傳

宋端平中創築。周不及一里。尋燬。淳祐中更築。復圯於水。寶祐間始營以磚石。元季復廢。至正中。拓舊址築之。周不及三里。明初復

圯。洪武十八年。邑人鍾子仁作亂。縣令鄧致中築城禦賊。民賴以全。尋復廢。正統十四年。屢被寇掠。景泰

六年。復事營築。成化八年。工始畢。城周八里。有門七。志云。縣北十五里有舊州城。卽汀州故城。詳見前。

金山

縣西北十里。邑主山也。巒嶂巒岿。蒼翠如畫。一名紫金山。宋康定間嘗採金。因名。上有三池。名曰膽水。上下二池有泉湧出。中一池則蓄上池之流。相傳宋時縣治密邇。其地水赤味苦。飲則傷人。惟浸生鐵。可煉成鋼。後縣治既遷。其水遂變。不異常水。山

側有百丈瀑。高可百丈。懸流如練。自石罅出。舊名黃金坑。水陽有南寶山。望之如筆。又有巖曰寶興巖。山南五里。卽舊縣治之鍾療場云。又靈蛇山在金山西北。峭拔凌空。○七峯山在縣城北三里。七峯巖巖翠麗可愛。一名七星山。爲邑後鎮。

冷洋山

縣東十五里。高出諸山。俯見縣治。下有水迸石而出。暑月尤冷。又亂石隔山。在縣東四十餘里。亂石巖巖。路出龍巖縣。志云。縣前溪南有橫琴山。平廣延袤。狀若橫琴。一名橫琴岡。又袍山在縣南五里。縣之前案也。亦曰掛袍山。又南曰美女峯。其峯

有四。蕪菁秀麗。又南爲三層嶺。嶺三級始至。其脊道出永定縣。○鐵嶂山在縣西。石壁峭拔。勢若屏嶂。山之西產鐵。鑛志云。縣西有展旗山。數峯連屬。迤邐若展旗然。縣之右鎮也。縣西北又有覆羅山。高聳特立。山頂端圓。若覆羅然。

茫蕩洋山

縣南百里。磅礴數百里。常上杭、永定、兩縣之界。峯巒巖絕。人跡罕至。西南通程鄉。東通漳州。姦民常據爲窟穴。急則逃入於廣。又羊廚山在縣西南百餘里。盤亘百里。高巖怪石千態萬狀。據汀、潮、二州之界。○雙溪嶺在縣北四十里。有二小溪

環遶其下。與長汀縣分界。志云。縣西有大礫嶺。路通武平。

又西有蜈蚣嶺。高聳縈迴五里許。嶺路蜿蜒。若蜈蚣然。

大溪

縣城南。卽鄧江下流也。自長汀縣匯衆溪流。經縣北。與語口諸水會。至縣治南山下。過美女峯。縈迴三摺。環抱而出。又西折而南。經潭口直抵廣湖入海。志云。大溪中有蓮花石。波濤洶湧。行舟毫釐失措。卽至覆沒。其上羣石聳翠。如蓮花。在縣南六十餘

里。又縣西北三十餘里。有觀音石。縣南又有烏虎石。皆在大溪中。○九曲溪在縣東北三十里。縈迴九折。流合大溪。又黃潭溪。源出縣東龍巖縣界。安鄉溪出縣東東安巖。南寶溪出南寶山下。又有樊溪。出鍾療場東。與南寶溪合。場西又有新田溪。亦流入南寶溪。縣北又有金山下溪。縣西又有水埔溪。出武平縣界。志云。縣境凡十餘溪。俱流入於大溪。

鹹水湖

在縣南三層嶺之北。有水一泓。味鹹不涸。縣東三十里大陂旁。亦有此湖。又天井湖。在縣東南二十里。闊五十餘丈。志云。舊在縣東。後忽移而南。相去十五里。又縣城西北亦有二湖。名天井。○草鞋潭在縣北二里。延袤數里。大溪所經。舟人云。行竟

此潭可成草鞋一雙。蓋狀其長也。又黃土潭。在縣北四十餘里。以潭旁土色皆黃而名。

大孤灘

縣南四十里。立石槎牙。舟難上下。行者必易載而渡。志云。縣境羣灘凡數十處。其近城者有馬尾灘。以灘水散流若馬尾然也。又有逃船灘。在縣西。灘勢甚險。舟行至此。必避溪旁。多爲之備。然後敢過。又有大籠鈎灘。屈曲若籠鈎然。縣北四十餘里。有目忌灘。水極湍急。舟人見之。輒增畏忌。又北有鑊風灘。灘有二水。一直一橫。浪滾如鑊。此數灘於羣灘中爲尤險。

梅溪砦

在縣東梅溪口。宋置今廢。志云。砦西水口有獅子石。高數十丈。又石壁砦。在縣西。旁有石壁潭。元置寨。今廢。○九十九段隘。在縣西南六十里。其西有郭公棟隘。東南有寒陂隘。皆山間小徑。至爲險僻。寒陂之西曰銀子凹隘。又北曰鮮水溪隘。與河頭隘並稱險要。志云。河頭隘在縣南五十里。縣之險隘也。今有官兵戍守。又瀨溪隘。在縣西四十里。防險說。縣南來蘇里之王壽山。縣東勝永里之狗困嶺。與瀨溪隘之龍障山。俱爲險峻。

小溪隘

在縣西南百里。志云。縣西南百二十里曰溪南三圖。與潮之大埔接壤。有上下二水。爲盜賊巢穴。邊平後。立撫民館於小溪隘之西坪。諸巢可慮者。惟此爲最。今有小城設兵置守。圖經。縣東北有羊蹄桃排采眉等隘。東有當風。蘆豐。板寮。大王。壩上。南坪等隘。南又有新長嶺。軍營。荷樹岡等隘。縣西有葫蘆通橋等隘。西北有河溪。檀嶺等隘。皆控扼處也。

平西驛

縣東三十餘里。成化六年置。又藍屋驛。在縣北七十里。成化十年。徙清流縣玉華驛於此。改今名。輿程記。自汀州府三洲驛。水行九十里。至藍屋驛。又南至縣。自縣南四十里。至大孤市。又七十里。過峯頭。又二十里。爲石上鎮。屬廣東潮州府界。自石上。又六十里。卽大埔縣。○永興場。在縣東五十里。又縣南六十里。有通利場。縣境又有金山。利濟。龍山。石門。語口等場。皆宋時採金及銅鐵處。

武平縣

府西南二十里。西至江西安遠縣百四十五里。南至廣東程鄉縣二十里。西北至江西會昌縣二十里。亦龍巖縣地。唐開元二十四年。置南安武平二鎮。隸長汀縣。五代時。王閩併南安爲武平場。南唐屬劍州之沙縣。宋淳化五年。升爲武平縣。析

長汀縣西南境隸焉。屬汀州。紹興間。築城周二里有奇。端平間增修。元時城圯。明朝成化中。復築土城。宏治十四年。毀以礮石。周三里。編戶十九里。

靈洞山

縣西十里。山有大洞三十六。小洞二十八。泉石皆奇勝。又西有雙鷹山。雙峯高插雲漢。○梁野山在縣東三十五里。一名梁山。高五十餘仞。分十二面。險峻巖出。絕頂有白蓮池。

黃公嶺

縣北百五十里。接長汀縣界。修阻二十餘里。上有泉。白石中迸出。僅杯勺許。而羣飲不竭。俗呼聖公泉。又常峰嶺。在縣北七十里。鑿石爲路。長五里。接永平寨。上有泉。又石徑嶺。在縣西北。高峻多石。路通羊角水。接江西會昌縣界。又白鶴嶺。在縣西

十里。江廣往來要路也。○南安巖在縣南八十里。形如獅子。中有二巖。南巖窈窕虛明。石室天成。東巖差隘。而石竇尤縝密。其中泉石種種奇勝。俗呼龍穿洞。又有十二峰。森立巖前。如拱如揖。又有綠水湖。亦在巖前。又南二十里有象洞。接潮州界。環抱紆迴。號九

十九洞

嘗於此置砦。

化龍溪

在縣治南。一名南安溪。源出縣東。流經此。又南合羣溪水。入廣東程鄉縣界。又聚霞溪。在城東。源出霞洞山。由西門流入。遶城東出。合化龍溪。又魚溪。在縣北。源出當峯嶺。南會禾豐溪。合徑口小溪。又南入化龍溪。禾豐溪在縣東北。源亦出當峯嶺。

又有千秋溪。源出梁野山。西流入化龍溪。志云。縣西北有濠坑溪。出江西安遠縣。下流亦入化龍溪。○露溪在縣東北一里。一溪七灣。俗呼露溪。七渡。引流而東。又北入長汀縣界。曰大順嶺小溪。接七里河。入於鄞江。又順明溪。出縣西大嶺下。西流至江西會昌縣。入大溪。大溪卽貢水上源也。又縣境諸溪皆有灘石之險。

象洞寨

縣東南百里。其地與潮惠接界。相傳嘗產象於此。宋政和中置營。嘉熙中改爲南尉司。元廢。明初復置。改爲巡司。又永平營。在縣北六十餘里。地名帽礫。宋淳祐中置寨。明初改巡司。圖經云。縣西南又有懸繩巡司。以懸繩峯而名。正德間。羣盜劉廷選嘯聚於此。事平。因置巡司。今皆有兵戍守。又三摺溪寨。在縣東五里。宋置。志云。營舊在溪西。爲汀、贛、梅、三州界首。後梅州廢。止隸汀、贛二州。紹興初寇燬。因移寨於此。又有屯營庵。在縣東何屯岡下。舊傳五代時統軍使何姓者嘗屯駐於此。築小城周圍二里許。故址猶存。

南安鎮

在縣南。唐置鎮。與武平俱屬長汀縣。五代時王閩改置武平場。南安遂廢。志云。南安、武平二鎮相距蓋二百二十里。○蟠龍岡隘。在縣西南三十里。昔時羣賊嘯聚處也。其北有鄧家坪隘。蹊徑錯雜。與廣東大帽山接近。有掛坑嶂諸巢。窺伺爲害。設軍駐守。又水口隘。在縣東南。又東卽象洞峇也。縣南曰鉢孟隘。皆南近大帽山。爲控禦要地。志云。縣東南又有處明隘。南近水口隘。縣東有金雞隘。大嶺隘。東北爲檀嶺隘。北曰湖界隘。西曰磴頭隘。皆設險處。有民兵戍守。

清流縣

府東北二百十里。東北至歸化縣九十里。東南至連城縣百三十五里。西至寧化縣六十里。本長汀、寧化二縣地。宋元祐初。析置今縣。以寧化之清流驛爲縣治。屬汀州。紹定中廢。元復置。舊有子城。相傳宋紹興間。因寇亂。築周一里有奇。後廢。元末邑人陳友定起義兵。破羣賊。因山南之險。壘石爲城。明初復廢。惟南門城址猶存。今編戶五十六里。

龍山

在縣治南。山脈自西蜿蜒而東。至此羣峯高聳。起伏如龍。元季陳友定於此壘城屯兵。名南岩山。其最高一峯。謂之南極。巖岈拔出。頂上時有白雲。遙望如疋練。旁有銅鑼山。塔山。皆山之支峯矣。又屏山在縣治北。屹然突立。蒼翠如屏。一名沙帽山。陳友定壘石屯兵。一名南岩山。志云。縣東三里有東華山。懸崖峭壁。前有斗臺。高聳入雲。登臺則景物皆在目。中又筆山亦在縣東。層巒疊嶂。回環二十里。中聳三峯。一峯尤高。縣西又有西靈山。爲縣之右鎮。

豐山

縣南百二十里。其頂如磨。常有雲氣覆之。宋淳熙間。有窮其巔者。積六日。乃得至其巔。坦夷如砥。可坐千數人。而四圍峭絕。人迹難逮。○漁滄隔山。在縣西南。峯巒峭絕。其南又有楓隔山。以山多楓木而名。

鐵石山

縣東南九十里。山高多石。堅黑如鐵。有磯曰鐵石磯。洞曰鐵石洞。洞口有九龍廟。廟前有九大灘。大灘之內。又有小灘。共有八。凡舟行者。必祈祐於廟。又東南十里。即九龍灘矣。○玉華嶺。在縣東北六十里。上有玉華西洞。石峯拔地。蒼翠橫空。玲

瓏穿透。可容百餘人。玉華洞之西曰石燕洞。東曰靈龜洞。皆有三穴。最深幽。又東隘嶺。在縣南一里。接橫口村。懸崖絕壁。有一夫當關之險。正德中。縣令林湜。因武平寇亂。守此以扼其險。又峽嶺。在縣東山勢臨水。中通一道。至嶺絕高。陳友定爲關於此。

向陽嶺

在縣東一里。峭陽嶺。峻險壁立。直插霄漢。曰擊陽。狀其高也。又分水嶺。在縣東北四十里。相傳陳友定嘗屯兵於此。又縣南十里。有橫溪嶺。高五百丈。路通寧化縣。方域志。縣西至磔頭嶺二十五里。南至百步嶺十五里。北至草鞋嶺六十五里。皆與

寧化縣接界。○瀟湧巖。在縣東北七里。飛泉怪石。茂林修竹。爲一方之勝。又靈峯巖。在縣南二十五里。中有洞穴。又七峯巖。在縣南六十里。有七峯突峙。四名。

清溪

在縣城北。其上游即寧化縣之大溪也。流經縣西北高地嶺。縈迴五十里。澄清如練。南至縣治西南。繞城環抱三折。經漁滄潭。下九龍灘。入延平府永安縣界。○牛溪。在縣北。源出高地嶺。經縣東北五里。西南流。合於清溪。又蒿溪。在縣北五十餘里。自寧

化縣界流入。過玉華嶺。南合清溪。謂之蒿口。又有青溪。亦出寧化縣界。流經高地嶺。合於蒿溪。謂之青口。志云。縣東又有芹溪。源出歸化縣。東南有羅口溪。出連城縣。亦謂之連城溪。經縣東六十里。今有芹口。羅口。即二水入清溪處也。又夢溪。在縣東南九十里。合山澗。諸水流入九龍灘。口溪中有潭。曰秋口潭。相傳溪上林木蒼蔚。行者如在夢中。因名。又三港溪。在縣西南五里。相傳有三小港。源皆出寧化縣。會流入於清溪。

九龍灘

縣東南百里。上六龍。屬本縣。下三龍。屬永安縣。九龍上下二十餘里。每龍兩崖。石峽道窄。如關隘。僅可丈餘。而石龍橫絕。水中高可數丈。乘舟下龍。如在高山墜於平地。舟子欲下。必倚鐵石磯。人盡避陸。空舟而行。雇土著篙師。欄頭庶可無恙。以縣

境止有六龍亦曰六龍灘元季陳友定嘗開鑿之以通汀州糧運明朝成化十八年縣令張案募工鑿去惡石灘勢稍殺然險峻猶爲七閩最詳見前永安縣○長空灘在縣東怪石縱橫中有大黃石尖聳險峭諺云黃石蒙頭十舵尤愁下有長空潭水色澄澈又漁滄潭在縣城東龍津橋南三潭相屬如貫珠清絕明瑩深不可測又黃栢洋在縣東五十里宋文天祥嘗引兵駐此

鐵石鎮

縣東南九十里正統六年議者以夢溪里山勢險阻草寇不時出沒奏置巡司於鐵石山下以爲警備○金錢隘在縣西北路通寧化又牙虎隘在縣東路通永安其北曰炭山隘路通永安縣安砂鎮

九龍驛

在縣治南元縣尉廳故址明朝洪武十一年改爲布政分司署而置驛於縣治東成化十年移分司於九龍驛改置驛於此又稅課局在龍津橋西北明初置正統初革

蓮城縣

府東南百七十里東北至延平府永安縣二百五十里本長汀縣地唐置蓮城堡於此宋紹興三年析置蓮城縣屬汀州元至正六年以討平草賊羅天麟於此因改蓮爲蓮取去草之意云有城宋紹興中築後圯端平中寇亂後復修築淳祐中增葺元

末復燬明朝正德四年築土城以禦寇九年燬以磚瓦十四年改營以磚石周二里有奇編戶三十三里

蓮峯山

縣東七里峭壁巒峯盤礴數十里絕頂平廣可容萬人宋皇祐中邑人彭孫保聚於此有城塞池塹又有雲樓宣武西南四門外有石梯石巷僅容一人紹定間寇亂邑人邱麟率民保此山設寨固守全活甚衆志云山一名東田石頂有石泉宋時

宜置三寨於其上○蟠龍山在縣北脈自清流縣蜿蜒而來入縣境翠峯連接

歷數十里至縣後屹然拔起高聳磅礴爲縣主山一名後龍山旁有龍子岡

白雲山

縣東南百里峻嶒疊秀高插霄漢時有白雲覆頂因名又縣南八十里有雲山峯巒峭聳勢逼蒼蒼時有雲出其上又南有高貴人山挺拔端重秀出羣山之表○大嶺山在縣西南五十里高峻層疊有路西北入長汀縣界又縣東北有上峽山兩

山夾立路出其中。圖經：縣東有冠豸山，四壁懸崖，惟一路可入。成化中，鄧茂七之亂，邑人多避難於此。賊攻，月餘不能陷。

虎忙嶺

縣西北里，接長汀縣界。山嶺高峻，登陟甚難。言虎過此亦倉忙也。相接者曰野狐嶺，嶺多狐，又分水嶺。在縣西北九十里。嶺之水西入長汀，東入連城，因名。相近者曰彭地嶺。宋彭孫嘗屯兵於此。又陡嶺，在縣西南，有小大二路，沿山絕頂，綿亘六七

里，以險阻陡峻而名。又垂珠嶺，在縣南百里，接上杭縣界。宋景炎二年，元兵破汀關，丞相文天祥移兵屯漳州，過此嶺，迴顧垂涕，居民哀之，表以此名。相近有遠水嶺，亦接上杭縣界。行人以重灘忠陟避水而登是嶺。志云：縣南有赤竹嶺，嶺多赤竹，亦接上杭。又有牛路嶺，盤旋十餘里，耕民販牛廣東，取路於此。縣東南曰橫山嶺，盤迴十餘里，接龍巖縣界。又縣東曰貓兒嶺，接永安縣界。兩峯對立，狀若貓兒相顧。○石門巖，在縣東七里，兩石相峙，壁立萬仞。縣南又有七星岡，環列凡七，如星之布。

文溪

在縣治南，亦名清溪。源出縣南百里金鷄山，與長汀濂合流至縣。凡九折而東，達於清流縣界，亦謂之羅口溪，皆以縈迴曲折而名也。又莒溪，在縣南百餘里，源出龍巖縣東山中，流入長汀縣界。入於勤江。又有蕭坊、新泉、諸溪，皆在縣南，流入上杭縣界。

合於大溪。○楊梅灘，在縣西北六十里，其水出長汀縣，合虎忙嶺諸水，灘流險阨，上多楊梅，因名。下流入於文溪。縣西南又有長灘，曲折多險，下流入上杭縣之大溪。志云：縣西一里有蓮塘，泉水所潛。縣東北又有蓮花潭，文溪下流也。傳以此名縣。

北團砦

縣西南六十里。宋置砦於縣北五十里，有巡司。後毀於兵，寄於縣市西。元末廢。明朝洪武十四年，改置於縣東。十八年，遷於縣南百里。隆慶四年，羣賊嘯聚於縣南碧莒洲，尋討破之。因遷司於新泉隘，築城戍守。○秋家嵐隘，在縣東，道出永安縣峯

巒層疊，爲盜賊蔽。自縣南而西，有朗村、豐頭、新泉、三隘。南接上杭，舊爲襟要。又廖天山隘，在縣東南，松杉參天，昔爲嘯聚處。因設隘防守。隘東數里，又有橫山隘。西數里有白嶺隘。又縣北有烏石隘。又西曰石固隘，皆爲戍守處。

金鷄場

在縣南金鷄山下，相近又有呂溪場。又郭家山場，在縣南三十里。又南有保成場，宋置，以開採銅鐵之利。尋廢。

歸化縣。

府東三百里。東北至延平府將樂縣百七十里。南至延平府永安縣百五十里。西南至清流縣九十里。本清流縣之明溪鎮。巡司當將樂、沙溪、寧化三縣之交。成化六年以其地曠遠民梗難治乃析四縣地置今縣。卽明溪巡司爲縣治。正德九年始築城。

嘉靖三十九年以寇亂增修。

周三里有奇。編戶四十五里。

樓臺鼓角山。

在縣治後。數峯連屬。中一峯高聳如樓臺。其餘峯圓者如鼓。長者如角。因名。縣之主山也。又南曰印山。山形高而平。正。又娥眉山。在縣治前。羣峯連絡。中一峯正對縣門。若娥眉然。縣治蓋北向云。○五馬山在縣西三十里。五峯周

遭連屬。其中土地蕃衍。居民殷實。溪水遶流其下。又西

北十餘里曰龍西山。奇峭壁立。約千餘丈。中有聖水巖。

紫雲臺山。

縣東南八十里。周圍二十里。高十里。其頂上平。有田塘水碓。民居四五百餘戶。腴田數千畝。氣候多寒。夏月無暑。每日色嵐光互相掩映。則紫氣氤氳。亦謂之均山。以三峯連絡也。聞見錄。紫雲臺山路峻巖有險。足恃。奸人易以竊據。戍守最切。

○銀瓶浪盡山在縣西南三十里。四峯連屬。中一峯圓尖如瓶。餘三峯圓小如盞。故名。又黃牛山在縣西四十餘里。山頂高峻而寬。平。宋紹定間有曾宜婦晏氏者倚山爲砦以拒賊。賊來攻不能陷。鄉人多挈家相依。於是析寨爲五。選少壯爲義丁。互相犄角。賊屢來攻皆敗去。

騰雲嶂。

縣東南九十里。高約五百丈。周百里。其形如蓋。志云。縣四十里有五頂嶂。亦高聳。又西有仁壽峯。特起數百丈。雲興則雨至。○鐵嶺在縣東三十里。置隘於此。道通將樂。爲縣襟要。亦曰鐵場嶺。又滴水巖在縣北五里。其上有泉水下滴。亢旱不竭。西

有洞闊約數十丈。洞內孔竅相通。凡數十里。下有流泉。出爲澗溪。諸水泉石奇勝。甲於一邑。又聖隱巖在縣東八十里。懸崖峭壁。樛木連陰。又東南爲黃楊巖。與永安縣接界。今詳見永安縣。

明溪

在縣東亦曰明江其上游出縣西二十五里伍通隘。流至城西南黃溪頭而始大環抱治南繞如腰帶。曰腰帶水一名黃溪水。又東北流崖側有大小二阜相對如明字。因曰明溪。經鐵嶺入將樂縣界。曰湖地溪。○所溪在縣東南。上源接明溪。中有石沿。渚夾峙里許。水從中出。謂之門檻石。又有瀚溪。出縣東北龍湖澗。引而南。與明溪並流入沙溪。東合衆流入沙縣界。亦謂之黃沙溪。縣東三十里曰雷窠溪。自翰溪分流沿渚十里。亂石嶧。吼激如雷窠。亦流合於黃沙溪。又有布溪。亦在縣東南。志云布溪接吉溪。沙溪之水。自縣東七十里巖前渡灑流。而東入沙縣界。吉溪即永安之龍溪也。

澆水

縣東十里。出滴水巖。分流並注。入於明溪。志云。縣東十里有黃窠水。出將樂縣界。下流與珩溪水會。○石峽澗在縣西南二里。流出山下。合於腰帶水。

夏陽鎮

縣東八十里。亦曰夏陽墟。宋紹興間。置明溪寨巡司。屬清流縣。在今縣治西。元末陳友定築城以障鄉里。周圍里許。謂之子城。明朝成化六年。改置縣。遂遷巡司於此。易今名。又有黃楊巡司。在縣東七十里。宋紹興中置。尋廢。志云。縣後市空。蕪山巖。有平章寨。陳友定立柵屯兵於此。因名。故址尚存。○明溪驛在縣西門外。宋元符中置驛。屬清流縣。明初因之。成化中屬今縣。輿程記。自驛西南六十里至清流縣之王華驛。又四十里。即九龍驛矣。一云明溪驛在縣西南十五里。

伍通隘

縣西二十五里。路出清流縣。縣西南五十里。曰牛隔隘。路達寧化。又有水口隘。在縣西北八十里。路通將樂縣。北百四十里。曰下坊隘。路出邵武府建寧縣。○長平墟隘在縣東北四十里。路出邵武府之泰寧縣。及將樂縣。又大嶺頭隘。在縣南二十里。路出永安縣。與縣東之鐵嶺隘。東南之紫雲臺隘。並為戍守要地。志云。縣環境皆山。東鐵嶺。西伍通。南大嶺。北下坊。關隘之襟要也。而東南之紫雲臺隘。東北之長平隘。西南之牛隔隘。西北之水口隘。並為肩綸之險。而紫雲臺一隘。關係尤切。路通永安。沙縣及將樂。順昌。諸處。聞見錄云。由紫雲臺而東北。其所出之道。曰夏陽。曰鷓公。曰廖源山。自廖源至將樂。不過八十里。又由鷓公山問道五十里。至招杉隘。又三十里。即順昌之源坑矣。

永定縣

府東南三百里。北至上杭縣百十五里。西南至廣東大埔縣二百二十里。本永安縣地。僻居萬山中。往往恃險樂禍。正統天順以來。草寇時發。成化十四年。渠魁鍾三嘯聚劫掠。事平。撫臣高明奏請立縣。治於溪南田心。名曰永定。編戶十九里。

臥龍山

縣治西北。蜿蜒如龍。縣之主山也。又龍門山。在縣東。峯巒連屬。山之西麓。爲貴人峯。峭峻端重。爲邑之左鎮。又印匣山。在縣西。頂平坦。若印匣。鄉民嘗避兵於此。志以爲縣之右鎮也。又掛榜山。在縣南。橫列如屏。○銅鼓山。在縣東北六十里。接上

杭縣界。拔地突起。高百仞。廣數里。民居其下。左右有二湖。皆廣袤。

數丈。其一雖旱不涸。名銅鼓湖。名勝志。山在縣西南四里。似悞。

虎岡山

縣北五十餘里。兩山相合。林木陰翳。亦曰斧山。縈迴數里。縣北八十里。又有黎袍山。蒼鬱蒼翠。遠望如畫。又縣東北七十里有蓮花山。峯巒聳峙。上有蓮花。○滿山。紅山。在縣西南五十里。森聳雄麗。半入潮州府界。

稔山嶂

縣北八十餘里。山勢峻突。綿亘百里。林木龍蔥。四時不改。上有石如馬。民謠云。石馬鳴。則有兵。成化十四年。草寇竊發。太監盧勝令軍士擊而碎之。嶂下有新村。嶺延袤十餘里。又有三峯。縈紆起伏。南接臥龍山。○松栢嶂。在縣南。志云。與廣東饒平

縣界。巒巘巍峨。林木蒼蔚。昔人多避寇於此。又桃

坑嶂。亦在縣南山。高林茂產。鐵。鄉民常鑪治於其下。

分水嶺

縣西北六十里。山勢崇峻。石徑險隘。水流南北兩分。一名豬槽門。路出上杭縣。又綠嶺。在縣東百里。嶺脊有圓墩。亦曰圓嶺。接漳州府南靖縣界。又三層嶺。在縣東南五十里。岑岡三折。最爲險要。今有巡司。○雪竹峯。在縣南。陡嶺插天。爲邑之勝。相

近爲水珠峯。兩山相向。奇秀特出。瀑布懸流。俗謂之雙飛蝴蝶。又縣北有

雙髻峯。兩峯並聳。如雙髻。縣北八十里有涼徽峯。岡巒翠嶺。亭亭若蓋。

楊梅嶺

縣南四十餘里。高峻磅礴。盤亘數十里。多產楊梅。又牙梳嶺。在縣西南七十里。水分南北。亦接上杭縣界。○伯公坳。在縣西南。南徑路窄狹。道出潮州。又寒水凹。在縣西北。路出上杭。石徑巖險。行者病之。成化十七年。縣令王環鑿石開道。行旅稱便。

大洲溪

在縣南源出龍巖縣界之大池西南流入境過縣治西折而南入廣東大埔縣界爲小靖溪又有文溪在縣東北六十里縣東百餘里又有武溪流合文溪而入大洲溪縣北又有金沙溪出分水嶺亦南合大洲溪志云縣北有磨石灘灘石錯立水勢澎湃縣南有箭灘以水勢如箭也又有羅灘以湍流回繞而名縣西又有樵灘驚湍沸浪言舟師至此顏色爲樵也

豐稔溪

縣北九十里源出龍巖縣界流入境與上杭縣黃潭溪合又西南會跳魚溪志云跳魚溪出徐山嶂合豐稔溪永安之大溪又有湯湖溪出黎袍山流合跳魚溪○涵水湖在縣西今名龍安砦湖水澄澈縈迴環繞中有土阜又縣治西南有晏湖周圍百餘丈山溪之水滲而爲湖有灌溉之利

興化鎮

縣西六十里亦曰興化鄉巡司洪武五年置司於縣南之古鎮尋徙虎岡山下改爲太平巡司天順六年以寇盜竊發移置今所又太平巡司在縣東六十里地名高坡正統中以山寇擾亂徙興化司爲太平司後爲寇毀景泰末徙置於此又三層嶺巡司在縣南三層嶺下成化十四年置司其地當閩廣之交盜賊出沒防禦最切

博皮嶺隘

在縣東北路通漳州龍巖縣爲戍守要地志云縣北有斧岡青坑溪口等隘自是而東爲布坑長流湖雷上寨等隘又縣東有鐵坑芻天坵南溪撫溪洋竹粵杏等隘又岐嶺隘在縣東南又東南爲下洋大溪月流等隘路出漳州平和縣○竹箭隘在縣南路出廣東大埔縣又東爲楊梅新村翁坑等隘與三層嶺巡司相接縣南境之要防也又伯公凹隘在縣西南其東曰錦豐渡爲南出之津要縣西又有斗古岡隘西北爲古樓岡黃鑿頭等隘志云縣境之隘凡二十有六而岐嶺博皮竹箭尤爲險要

藝梓堡

在縣東北志云唐置上坑場於縣東豐田里南唐移於藝梓堡是也今詳見上杭縣又縣有興濟端利嘉興浮流錦豐五場俱宋置爲採鐵之所

附見

汀州衛。

在府治東。洪武四年建。○武平守禦千戶所。在縣西南二十五里。洪武二十四年建。築城濬濠。周二里有奇。置兵屯守。又上杭守禦千戶所。在縣治北。天順六年。以溪南寇作亂。始調汀州衛後千戶所守禦。成化二年。遂置所於此。俱屬汀州衛。

邵武府。

東至延平府二百五十里。南至汀州府五百五十里。西至江西建昌府三百六十里。北至江西廣信府四百十里。東北至建寧府二百八十里。自府治至布政司六百七十里。至京師四千八百三十里。

禹貢揚州地。周屬越地。秦屬閩中郡。漢屬會稽郡。三國吳屬建安郡。晉以後因之。隋屬撫州。大業初。屬臨川郡。唐屬建州。五代時。王閩因之。宋太平興國四年。置邵武軍。元曰邵武路。明初爲邵武府。領縣四。府山川蜿蜒。土田夷曠。居列郡之上遊。作全閩之西戶。自江右而入閩中者。下三關。出樵川。勢如建瓴矣。明初取閩中。亦道出於此。豈非攻守要地歟。

邵武縣。

附郭。漢治縣地。後漢末。爲建安縣地。三國吳始於此置昭武鎮。永安三年。升昭武縣。屬建安郡。晉太康初。改曰邵武。避司馬昭諱也。太寧初。改曰邵陽。劉宋初。復曰邵武縣。仍屬建安郡。齊梁因之。隋平陳。郡縣俱廢。開皇十二年。復置邵武縣。屬撫州。唐武

德七年。改屬建州。五代晉天福初。王閩又改爲昭武。開運二年。屬於南唐。尋復曰邵武。宋爲邵武軍治。今編戶百七十一里。

烏坂城。

府治東三里。蕭子開建安記。越王築六城以拒漢。烏坂其一也。亦曰故縣城北倚山麓。南濱大溪。志云。今府城宋置軍時所築。本土城。周十里有奇。後廢。元大德二年。因故址。壘以陶甓。惟西南隅縮舊城一里。至正二十四年。復修築。瑩以磚石。明朝

洪武初修城濬濠。五年以後相繼營葺。永樂十四年大水。圯城之半。尋復修築。今城周七里。有奇。

登高山

在城西。一名熙春山。有三峯。舊謂之靈泉三峯。嵯峨聳峙。下瞰城闔。成化十二年。郡守馮孜上言。府城東北臨大溪。西南穿小溪。東則三水合流而去。惟西南密邇熙春小山。宋時城郭東南北三面俱臨溪。西則跨熙春。遇水泛漲。人得趨避。元人建城。不跨熙春。城濠南北與大溪接。遇水泛漲。溪入於濠。濠灌於城。永樂中。嘗被其害。况熙春去城密邇。脫有賊寇。憑據之。則城內虛實皆見。宜因宋城舊址爲便。不果。山南有西塔山。一名金鰲峯。卽三峯之一也。○樵嵐山在城西北十里。一名金蓮峯。樵溪之水出焉。宋石正言孫謬居此。亦名三諫山。俗謂之鍾家岐。名勝志。城北有萬峯山。以山據諸峯之會而名。其相屬者曰蒼山。舊名米倉山。曰石鼓山。相接者爲蓮花峯。又縣東北有泉山。山麓谷口僅容單騎。循澗而入。深遠夷曠。有田數頃。澗水曲折。山勢環抱。謂之蒙谷。爲近郊之勝。

鷄鳴山

府東二十里。宋開寶初。盧絳叛。入閩。人不知避。夜半。忽山頂鷄鳴。人皆起而賊適至。遂得免害。因以名山。又三壘山。在府東六十里。當邵武。建陽。二縣界。自武夷盤礴而來。上有三級如臺。因名。亦名楊源山。府東百里。又有龍山。山大而高。抵建陽書坊界。其東十里。又有龍鬚山。山周三十里。接建陽。順昌。二縣界。○白水山在府東百二

十里。山勢高聳。上有瀑布懸流。凡數十丈。狀如匹練。相對者曰九壘山。亦有瀑布泉。

七臺山

府東南百五十里。跨汀。延。邵。三郡界。高二十餘里。上有七臺。又有洞。曰百花洞。泉石皆奇勝。又寶山。在府東百六十里。舊產鐵鑛。相接者曰東山。高亦百餘丈。○紗籠山在城東數里。羣峯攢抱。中一峯獨高而直。又雲巖山在府東四十里。高出羣岫。俯瞰長川。上有巖。吞吐雲氣。又東四十里曰天池。

山。山高大而頂寬平。有池方廣數畝。冬夏不涸。

道峯山

府東南八十五里。亦曰道人峯。當邵武將樂、泰寧、三縣界。危峯峭拔。矗入霄漢。寰宇記：道人峯負長溪。面樵水。秀峙數十里。外其險處名羅漢巖。下臨絕壑。山周圍蓋八十餘里。幽泉怪石。不可勝記。○南午山在府南三十里。山有三峯。俱當午位。與郡治相對。一名葉寮山。相近爲高嶠山。上有風洞。深不可測。時有風出其中。旁有嶺。路通泰寧縣。又殊山在府南百十里。雙峯聳立。直插霄漢。亦名文筆山。其東爲小殊山。視殊山雖小。而奇峻更勝。志云：府東南二十餘里有浮潭山。三峯秀峙。東南八十里曰凌雲山。高千三百餘丈。仰逼霄漢。又府南九十里曰潮魚山。亦有三峯鼎立。

天馬山

府西北七十里。山勢如馬從空而下。一起一伏。周五里。又龍湖山在府西北百里。山勢峻拔。深谷盤迴。絕頂有湖。澗田三萬餘頃。一云山在府西五十里。又有象牙山。亦在府西北。接光澤縣界。○雲錦山在府西南八十里。高峯環合。凡三十有六。又府東南四十餘里有白鶴山。高峻如孤鶴冲天。一名天地峯。

劉師嶺

府南百二十里。路出建昌府。烏道欽崎。綿亘六七里。人以爲病。戲名愁思。宋上官端義募衆鑿路。行者便焉。又望州嶺在府西北七十里。高聳望見府城。又府西百餘里有飛猿嶺。以高險得名。○金嶺在府東四十里。舊時夾道多松。亦名千松嶺。又天湖嶺在府東南四十里。俱路出順昌。又府東五十里有分水嶺。嶺水分流。東達建陽。西入邵武。相近有洪家嶺。府東百餘里。又有吳師嶺。皆路出建陽縣。府東百六十里。又有三望嶺。路通將樂縣。

紫雲溪

在府城北。源出光澤縣之西北二溪。合流入境。會諸溪水。東下經城北。其流益大。又東南至順昌縣之富屯。下流入順陽溪。俗名大溪。樵水入焉。亦名樵川。志云：大溪會衆水。東下一百二十里至富屯。其中有灘五百餘。諺云：一灘高一丈。邵武在天。上。又樵溪在府治北。發源樵嵐山。經城西而入城中。逶迤九曲。因名九曲溪。亦名秀水。出城北。東流入紫雲溪。○將溪在縣東。自建陽縣流入境。合諸谿澗水入紫雲溪。又酒溪在縣東二十五里。其上游曰青雲溪。以相近有青雲山。溪經其下也。又有壺山溪。一名

九里溪源出分水嶺亦曰分水溪西流會洒溪而入紫雲溪曰洒口府東四十里有平洒溪諸山澗水匯爲大湖自高臨下溉田數萬畝東南流入紫雲溪

大挈溪

府東八十里源出建陽縣界東北流至挈口亦曰挈口水諸溪澗水皆流合焉志云府東百二十里有下黃溪出建陽縣界東南百五十里有桃溪出將樂縣界又有大竹溪在府東南五十里皆會諸溪澗水流入紫雲溪○西峽溪在府西七十里

自光澤縣界流入又有三澗溪在府西三十五里石鼓溪在府北二里源出崇安縣桐木關皆會諸溪澗水共入紫雲溪志云府城上下流會大溪者凡三十有二溪溪皆有灘石而大拿溪中有小湖操大湖操編孔灘水石衝激舟人病焉

三溪

府南六十里出將樂縣境西北流三十里又轉西南流入泰寧縣之大溪又府西南百二十里有太和溪源出殊山流合三溪西南百餘里又有將石溪源出江西新城縣界流至此亦西南流入於三溪又有官坊溪在府南百里其地有官尖峯溪源出

爲流合諸溪

澗同入三溪

水口鎮

府東百六十里有水口巡司宋爲水口寨元因之明朝洪武二年改巡司○楊坊砦在府東北五十里宋紹興二年置元改巡司明朝洪武十一年省有稅課局元所置稅課務也明朝改今名又挈口砦在府東八十里亦宋置砦元改巡司明初廢

其地與順昌縣接界元時亦設稅課務今爲稅課局又同巡砦

在府南五十五里亦宋置寨元改巡司明朝洪武十一年省

黃土寨

府西南四十里亦曰黃土關有黃土嶺路通江西廣昌南豐二縣亦戍守處元置黃土砦巡司於此至正十九年陳友諒遣其將鄧克明侵邵武陳友定大破之於黃土卽此宋志邵武縣有黃土等三鹽場龍須銅場寶積等三鐵場

樵川驛

在府城東宋置於城內元徙於城外紫雲溪北明初移於此又林墩馬驛在府東五十里宋置元及明朝因之又拿口驛在府東八十里接順昌縣界志云府東三十五里有樂野宮建安記越王無諸畋獵縱樂處也又泰寧縣西隅亦有此宮縣南

爲高平苑。今皆爲民居。詳見將樂縣。○濟川橋在府城西。俗名水北橋。宋嘉泰二年創建。嘉定初落成。因名嘉定橋。紹定三年毀。端平初重建。改名端平橋。淳祐十二年圯。咸淳中建。改名環碧。元至元末毀。大德六年重建。因亦名大德。元統二年毀。至正三年。壘石爲址。凡十有三架。梁構亭其上。亦曰至正橋。二十一年復燬。明朝洪武八年重建。改名樵溪橋。永樂四年毀。正統十年復議修建。成化四年橋成。名濟川橋。自是以時修治。長六十三丈有奇。又新屯橋在府東四十五里。元至正中。嘗建橋於此。壘石爲址而梁之。長六十餘丈。尋廢。

光澤縣。

府西北七十五里。西南至泰寧縣百六十里。西北至江西鉛山縣百八十里。西至江西新城縣百四十里。本邵武縣地。唐武德七年。以縣北鄉地置陽寧鎮。五代周廣順初。南唐改爲財演鎮。並屬建州。宋太平興國六年。升爲光澤縣。屬邵武軍。元因之。縣

無城。今編戶五十五里。

雲巖山。

縣南一里。蒼翠秀拔。高入雲表。上有湖。天欲雨。則湧沸如雷。○烏君山在縣東北五里。山高二千餘丈。其相接者曰烏石嶺。括地志。邵武有庸嶺。一名烏頭嶺。是也。寰宇記云。烏石嶺路峻極。不通牛馬。一名烏珮山。上有雙石。皆高二十餘丈。屹然相

向。名雙石筍山。跨邵武。建陽。鉛山。三縣界。或以爲紫雲溪出此。又珠寮山。在烏君山南。同源異峯。是爲諸山之母。一名諸母岡。又縣東南有筆架山。三峯峻峙。中峯尤高。南望大溪。近不過十里。北爲旗山。疊嶂飛揚若旗。又步連珠寮山。

大和山。

縣西北百二十里。與江西南城縣接界。山有鐵牛嶺。舊置關於此。相接者曰小和山。舊置大寺。寮巡司於山上。又石螺山。在縣西八十里。兩山相合。大石犄角對峙於溪上。曰石門。僅通單騎。有石如獅子。昂踞溪中。旁有石如螺。其水奔激。至水口入

西溪。志云。縣北有交椅山。山形兀巘。爲縣治斧辰。縣治西北七里。曰青山。西連三千嶺。邑之寶山也。

杉嶺。縣西北九十里。爲福建、江西分界處。石山雄絕。蹊徑僅容單車。置關其上。曰杉關。洪武三年。移大寺營巡司於此。以扼關險。循嶺而南十里。爲豪居峯。高聳插雲。爲關藩障。詳見前重險杉關。○盤肩嶺在縣東北百里。東抵江西弋陽縣。西抵貴溪縣。山高

徑險。盤曲而登。又雲際嶺。在縣東北四十里。接江西弋陽、鉛山二縣界。又有徑路。通浙江江山縣。北溪出其下。

象牙峯。

在縣西南。接邵武縣界。一峯屹立。旁有二十四峯。森秀如象牙。邑之來山也。邑志云。離象牙而東四十里。至三千嶺。飛泉怪石。人不可登。又白雲峯。在縣西南二十五里。奇峯特峙。高入霄漢。晨昏有雲氣蒙其上。因名。○令仙殿在縣北三十餘里。高

二千餘丈。巖口有石穴。中深而方。清泉常滿。俗名石斗巖。後澗泉出口穴中。高數丈。名曰水濤。

杭川。

在縣北。俗名大溪。源出縣西七十里極高嶺。東流合杉關。止馬。諸水曰西溪。經雷公灘。以水石相激。灘聲若雷也。又經縣西八里。之塘石灘。怪石攢疊。飛流迅激。每遇水涸。則舟不能進。至縣西北杭溪。徐源諸水流合焉。曰杭川。經城西北一里之黃龍灘。

東流南折。有晏公灘。至縣東二里。北溪水流滙焉。是爲交溪。溪中有洲。曰烏洲。一名月洲。浮交溪中。又東南流。逾龍孔灘。復南流三十里。入邵武縣界。爲紫雲溪之上游。一云西溪水出縣西五十餘里管密山之洞光巖。逾雷公灘五十里。至水口。石螺山水來會焉。

合流爲

大溪。

北溪。

縣東北三里。源出雲際嶺。至縣北百里。有昂山水合焉。南流四十里。合沂洲水。又南三十里。逾茶富渡。出大里峯。有漠溪流合焉。又南二十里。流會西溪。所謂交溪也。

杉關。

在杉嶺上。有杉關驛。元元統初建。明朝因之。志云。關之東有大寺寨。巡司宋置。寨於縣北三十里。元至元二十五年。遷於縣北六十里。止馬市。明初遷於此。以備戍守。又舊置杉嶺驛於關下。尋廢。餘見前。○鐵牛關在縣北五十里。相傳唐廣明中置。聞見

一錄。光澤有鐵牛、火燒、雲際、三關。雲際關通湖坊。係江西鉛山縣界。去崇安桐木關一百八十里。又風掃隘。在縣西五十里。頓筆山上。又宋志。縣有太平銀場、新安鐵場。

杭川驛

縣治西。宋置。熙寧中。遷縣治南。明朝洪武六年。遷今所。又稅課局。在縣西止馬市。宋初置。稅課務於縣治東。明初改爲稅課局。宣德九年。以縣官兼領。正統十一年。改建於今所。

秦寧縣

府西南百四十里。西至建寧縣七十五里。東南至延平府將樂縣百二十里。晉綏成縣地。屬建安郡。唐初亦爲綏成縣地。後爲將樂縣地。乾符二年。析置歸化鎮。南唐保大元年。廢鎮爲場。中興元年。升爲歸化縣。俱屬建州。宋太平興國五年。改屬邵武軍。

元祐初。改今名。縣無城。今編戶五十一里。

鑪峯山

在縣治西北。圓峙如鑪。邑之主山也。志云。縣南五里爲南谷。有曲澗層崖之勝。又十里爲齊雲巖。俯瞰大溪。右爲獅子巖。其高處爲百丈巖。巖跡峭削。鳥道縈紆。人迹罕到。其相近者。又有甘露巖。石門天成。一徑如線。飛瀑千尺。垂巖而下。稱絕勝云。

○鍾石山。在縣北十五里。形如覆鍾。周圍壁立。其上坦平。下臨清溪。高可百尺。綠崖爲徑。志云。縣東北數里有旗山。勢如展旗。延袤五里餘。與鑪峯山對峙。西麓有棲真巖。蓋縣之來山也。相近又有古靈山。圓下銳上。高百餘丈。其東北一里有風石寨。北有神

巖。仙。

鳳棲山

縣西四十里。一名黃西山。峭石壁立。鳥道羊腸。縈紆以登。南麓有池。廣數頃。甚深。兩旁崖石峭立。筏乃可渡。至則曠然平野。可居數百家。昔人嘗避地於此。今涸爲田。又有南會巖。三石鼎立。旁有數巖。俱有小逕可登。上有流泉。竹木之勝。一名南會

山。又有簾山。在縣西二十里。高廣十餘里。石崖壁立。林木蒼翠。宛如簾幙。縣西四十餘里。又有蓬源山。高六七里。延袤十餘里。○薯山。在縣北三十里。其南有雞籠障。西曰龍門寨。又南石山。在縣東北三十里。石皆南向。上有寨。下有龍井。周圍峭壁。山南有石穴。人

不可到。志云：縣西南三十里有關壘山，其北爲挽舟嶺，嵯峨千丈，延袤十有三里，必牽挽而後可登，如挽舟上灘然。南有二石對峙，曰三門嶺，亦曰三門寨。寨北有西巖，一名寶雲巖，亦曰彩雲巖。山蓋與建寧縣接界。

金鏡山

縣西七十里，亦名大歷山，一名大戈山，跨建寧、寧化、泰寧三縣界，有八十四面，周四百餘里。九域志：越王無諸遊獵，遺金鏡於此，因名。有石燕巖，深廣多泉石之勝，又有華蓋巖、石磴架迴而上，上有池，謂之仙塘，旁有黃楊埭，龍潭在焉。漑田可千畝。

亦曰龍平潭，又有王仙峯及玉龍峯。志云：山以名勝稱者，凡十有八處。又大坳山，在縣西六十里，延袤十里，峭石壁立，巖洞幽深，人迹罕到，可以避難。中有葛家崆巖，聖公巖，際隴巖，險僻可置寨。正統間，沙寇作亂，居民多避於此。○天壘山，在縣西六十五里，四峯並聳，狀如寶蓋，高千餘丈，盤結三十餘里，上有池，池北有雙人石，以形似名也。又石仙山，在縣西南六十餘里，其南爲金雞嶂，一名雞籠山，以山大而圓也。西曰羅洋嶂，一名閩王嶂，山高林深，人迹罕至。志云：縣北十餘里有大洋嶂，特立高聳，上有池，前有三峯，其東又有小坑嶂，即縣治後山也。

陰山

縣東二十里，一名應山，盤礴十餘里，有雞籠寨。志云：縣南數里有鼓樓山，跨將樂縣界，山形方峻，若樓閣然。又有印山，在縣西南八十里，山北爲籐嶺，產籐，道出寧化縣，相近爲雲蓋山，山勢峭拔，雲氣常蒙其頂，上有龍泉瀑布。○五龍山，在縣北十五里。

連邵武縣

之道峯山

大杉嶺

縣西北二十里，路通江西建昌府，多產杉木。吳越時，遣兵屯戍於此，又九盤嶺，在縣西五十里，紆迴九曲。志云：縣西北六十里有茶花嶺，廣二十里。○峨眉峯，在縣北五十里，周圍數十里，高數千丈，類蜀之峨眉峯，之左有三仙巖，泉石幽勝，巖前有

三峯，狀如筆架，峯之西卽建寧縣界。又七寶峯，在縣西六十餘里，高千丈，產金、銀、銅、錫。朱石、黃連、甘草之屬，世傳越王遊獵時，鯨此，宋爲銀場，後廢，奸民多盜鑿之，山遂崩墮。

大溪

在縣治南。其上源出寧化縣境。流經建寧縣。曰灘江。東流入縣境。至縣西南三十里之梅口。邵武縣之三溪水合衆溪來會焉。爲雙溪渡。又東過縣治。迤邐而南。至縣南五十里青洲渡。又東南合將樂縣界竹洲溪。而爲延平西溪之上原。志云。縣境遠近諸溪凡二十有八。皆流合於大溪。

二十四溪

縣西四十里。漚山谿之水東出。有石山夾岸錯立。峯巒周密。凡二十四曲。西南至梅口入大溪。又鋪溪。在縣南五十里。源出寧化縣境。爲柳泮水。北流二十里至合口灘。入大溪。又瑞溪。在縣西二十里。出峨眉峯。流四十里入大溪。旁有瑞峯巖。因名。志云。縣有龍安溪。源出縣西南八十餘里君子峯。流二十里。有善溪流合焉。又北會鋪溪入於大溪。其善溪在縣西南六十里。導建寧縣境內之水。回環流合龍安溪。中有鱗潭。一名池潭。其深莫測。有旋渦。舟人病焉。○龍門溪在縣北四十里。出大杉嶺。有鮎鱗潭。流合焉。經縣東二十里。下流亦入大溪。

杉溪

縣北五十里。出茶花嶺。經大杉嶺。下至縣治北。又黃溪。在縣東南五里。出將樂縣界寶臺山。西北流。經縣東一里。與杉溪合。而漚爲河潭。亦名龍潭。潭之下有灘。狀如斗角。溪流至此。兩山環拱。乃折而西。流三十餘里達梅口。會於灘江。而邑之衆水亦皆歸焉。梅口有灘。曰大夾灘。亂石巉巖。兩旁石崖壁立。奔湍激浪。其聲若雷。舟楫至此。最爲險阻。下流五里。而爲雙溪渡。黃元寶云。諸溪之水皆從石山中流出。至此。兩岸開豁。桑麻沃衍。梅川市在焉。溪東接道人峯水。西與灘陽水合。復折而東。趨於劍津。平沙曠堤。雨漲則瀾。霜凋則夷。可舟航而不可輿梁。實汀邵往來之衝。

梅口寨

在縣西梅口保。宋紹定五年。統領劉純分忠武軍於此。以鎮羅源筋竹之寇。後廢。又朱口寨。在縣東三十里。宋紹定中設。元改爲巡司。尋廢。又石門隘。在縣西五十里。又縣北四十里有澗子隘。五十里有茶花隘。以茶花嶺名。舊俱爲戍守處。宋志縣

有螺鏤金場。江源銀場。○利涉橋在縣治南。跨大溪上。石址木梁。醜水爲五道。宋元以來。歷代修建。又安泰橋。在縣東南五里。跨黃溪上。一名延福橋。洪武三十一年重建。後圯。萬歷初復建。改名迎恩橋。長四丈。有奇志云。橋東通邵武。南接建寧。往來孔道也。相近者又有隆興橋。長二十餘丈。

建寧縣

府西南二百四十五里。南至汀州府寧化縣百八十里。西至江西廣昌縣二百里。北至江西南豐縣百五十里。晉綏成縣地。唐垂拱中。爲將樂縣及撫州臨川縣地。乾符二年。置黃連鎮於此。五年。鎮人陳巖以鎮兵禦黃巢。因表爲義寧軍。五代時。南唐罷爲永安鎮。又改爲永安場。宋建隆元年。南唐升爲建寧縣。屬建州。太平興國五年。改屬邵武軍。咸淳二年。始城之。明朝宏治四年。因舊址改拓。正德十二年。復營繕。周四里有奇。編戶五十二里。

綏成廢縣

縣治西南三里。晉義熙中。析邵武縣地置綏成縣。劉宋因之。屬建安郡。或云吳永安三年。置綏安縣。義熙初。改曰綏成。愷督志無綏安縣也。齊梁仍爲綏成縣。隋廢。唐武德四年。復置綏成縣。隸建州。貞觀三年。省入邵武縣。垂拱四年。以綏成故地屬將樂縣。及江西臨川縣。乾符二年。分故綏成地爲歸化、黃連、二鎮。而以舊治爲黃連鎮。南唐曰永安鎮。宋建隆初。升鎮爲建寧縣。移縣治於今所云。

鳳山

縣治西山分三支。狀若翔鳳。又西有西山。形勢聳拔。上有戰坪。相傳南唐取建州。宋齊邱督戰其上。北連平山。山頂平坦。容百餘人。又縣治東有東山。一名何山下。有何潭。環繞縣治。○金鏡山在縣南二十里。接泰寧寧化二縣界。在縣境者有東西巖。屹然並峙。相傳舊有巨藤。交互成橋。可通往來。寇亂。邑人多避兵於此。後藤絕。而路隔。其跨縣南數里者。曰長嶺山。曲折起伏。橫亘數里。餘詳見泰寧縣。

望君樓山

縣西四十里。峯巒秀麗。層巒如樓閣。若人擬立而鼓掌。一名聖峯山。又嚴峯山。在縣西六十里。脈接江西廣昌縣。兩峯雙立。南北對峙。相近者曰雲蓋山。山勢高聳。時有雲氣覆之。石巖懸絕。瀉瀑如練。亦接廣昌縣。○寶山在縣東二十五里。蹶

土白壤。宜陶。藍溪經其下。有坪曰桐樹坪。地勢平夷。上多桐樹。又龍蹄山。在縣東北四十里。山勢蜿蜒若龍。其木多漆。

百丈嶺

縣北三十里。嶺極高峻。乃江閩分界處。鳥道懸絕。舊傳越王無諸嘗築臺於此。藍溪出焉。南流入澗江。又蟠湖嶺。在縣西北七十里。接江西南豐縣界。上有湖。潛水不涸。東有大峯高五百丈。又有小峯高二百丈。

澗江

在縣治南。本名綏江。以綏成縣名。後譌綏爲澗也。俗名大溪。出寧化縣界中順山。經縣南五十里。亦曰寧溪。又東北流至此。曰澗江。東流七十里。有金鼎澗。亂石險阻。湍水衝激。中有一石如鼎。又東北入泰寧縣界。志云。縣東南二里有洛陽溪。溪出金鏡山。北流入大溪。中有澗。曰金澗。又有都溪。出雲蓋山。東南流入澗江。縣境諸溪。凡十有七。俱瀆於澗江。○桃源溪。在縣西南二十里。金鏡山下。亦曰西源。衆山環秀。溪滂其中。繞流三級。謂之陳家澗。亦曰三層澗。居民百餘家。擬於桃源。導流北入於澗江。又九流澗。在縣東北七十里。流爲楚溪。中有黃瀾澗。東入泰寧縣界。會於大溪。

西安鎮

縣西四十里。宋置西安砦。在縣西六十里。元改爲巡司。明朝洪武三年。遷於今所。○羅漢砦。在縣城北。宋乾道四年。羣寇何自旗作亂。張浚請設兵置寨於此。又永平寨。在縣西六十餘里。舊名羅源筋竹。寇區也。宋紹定五年。置寨。又軍口寨。在縣東南四十里。亦宋紹定五年置。元改巡司。縣東南五里。又有將屯寨。亦宋置。爲屯戍處。相近有地名巢隔。相傳唐陳巖率民兵禦黃巢。使隔絕不能近。因名。後皆廢。

洛陽驛

縣東南二十五里。又有都溪驛。在縣西三十里。今俱廢。舊志。縣西熊家嶺有綏城驛。縣東有鳳山驛。縣治北有澗江驛。皆宋元時置。明初廢。宋志。縣有龍門等二銀場。○鎮安橋。在城東。宋紹定初。建疊石爲址者。凡七。自元以後。屢經修建。長二十餘丈。

附見

邵武衛。

府治東南。洪武初改。

元邵汀萬戶府置。

讀史方輿紀要

卷九十九

福建五

泉州府

東至海百二十里。南至海百有三里。西南至漳州府二百七十里。西至汀州府五百五十里。西北至延平府五百五十里。東北至興化府百六十里。自府治至布政司四百十里。至京師七千五百五十五里。

禹貢揚州地。周閩越地。秦屬閩中郡。漢屬會稽郡。三國吳屬建安郡。晉屬晉安郡。宋齊因之。梁天監中

析置南安郡。

治晉安縣。

隋平陳郡廢屬泉州。

時泉州治閩縣。

大業初屬建安郡。唐武德五年置豐州。

治南安縣。

貞觀初并入

泉州。聖歷二年置武榮州。

初治南安。旋治晉江。

三年州廢還屬泉州。久視元年復置。景雲二年改為泉州。

改故泉州為閩州而

以武榮州為泉州。

天寶初曰清源郡。乾元初復曰泉州。五代時屬於王閩。後屬於南唐。

石晉開運二年南唐得泉州地。三年南唐置清源節度使。以授

留從効。

宋仍曰泉州。

亦曰清源郡。宋紀乾德初改清源軍曰平海軍。

元曰泉州路。

福建行省嘗置於此。今詳見前福州府。

明初曰泉州府。領縣七。

府倚山爲險濱海稱雄北奠吳會之藩籬西連嶺粵之唇齒一有不虞不惟八閩數州同憂共患而已。蓋水陸異用戰守殊趣一隅之地而千里之形在焉論泉南者第謂其土膏民沃華實所資抑未矣。

晉江縣

附郭晉爲晉安縣地隋爲南安縣地唐開元八年始析置晉江縣爲泉州治今編戶百二十九里。

刺桐城

卽府城以昔時城下都植刺桐樹而名志云郡舊有衙城子城羅城翼城內外有濠舟楫可通城市歲久類多埋廢衙城在子城內相傳留從効所築子城則唐天祐中王審知所築也羅城亦留從効所築子城周三里有奇羅城周二十三里有奇

宋太平興國二年陳洪進挈地歸朝詔三城皆毀壞宣和以後復葺舊址嘉定四年始大加修治紹定三年郡守游九功於羅城之南築翼城磬石二里有奇元至正十二年以四方盜起監郡侯玉立議尋故址增築乃拓羅城翼城而一之周三十里有奇城在五代時名葫蘆城以城不正方也改築後象其形曰鯉魚城明朝洪武初增修天順至成化中復相繼修葺宏治嘉靖間亦時有營繕萬歷三十二年地震城圯益加葺治城內有濠頗深廣濶濶三面獨東北阻山麓無濠濠本在城外元末拓城城南濠因入城中城有門六水門一隆慶二年增爲三周廣皆因元舊。

泉山

府城東北八里一名清源山一名北山一名齊雲山周圍四十里橫跨十餘里高數千仞郡之圭山也寰宇記泉山以山有孔泉而名朱買臣謂東越王居保泉山卽此山多石泉出石竅中故曰孔泉上多巖洞諸勝其得名者凡三十六處而尤著者曰

清源洞郡志泉山上起三峯俗名三台中峯有清源洞一名純陽洞登其巔可盡一郡之勝俗謂東歐王避漢兵處悞也其左右二峯俱高秀層巖稠疊達於郡治有事時清源爲攻守要地矣又鳳山在泉山南山四拱如飛舞一名皇績山嘉靖三十七年倭

賊掠鳳山。清源山。犯南安。明年復由此入犯。○雙陽山在府北四十里。泉山來脈也。兩峯並峙。曰大陽。小陽。在南安縣。則謂之朋山。在永春縣。則謂之雙髻山。蓋山接三縣界。各以形似名。又五洋山在府北五十里。高頂中有田千畝。宋時有五姓居此。今譌五爲吳。有小髻洞。可以避兵。山麓又有清水巖。

紫帽山

府西南五里。山高峻。常有紫雲覆其上。因名。中有甘泉。味最勝。志云。環山凡十二峯。而二峯尤高。左峯之陰有金粟洞。右峯之頂有凌霄塔。與泉山南北對峙。爲郡之案山。又獅山在府南十里。一名峯山。相傳昔人置峯寨處。又南爲行轅山。俗曰下

轅。○羅裳山在府南三十里。其東有玉髻峯。又南十里曰靈源山。蜿蜒數十里。高出東南諸峯。上有靈泉。大旱不竭。一名太平山。以山頂平正也。亦曰吳山。志云。山西北麓有吳明宮。亦曰吳明山。昔有吳氏隱於此。後人爲宮以祀之。又有石曰望江石。南瞰大海外。如在眉睫。絕頂又有紫霞峯。

寶蓋山

府東南四十五里。一名大孤山。絕頂有石塔。宏壯突兀。出於雲表。商舶以爲抵岸之標。半山有虎岫巖。東南跨海。又有玉泉井。在石塔下。隨海潮汐。以爲盈縮。相近者曰金鞍山。亦名小孤山。○金紋山在府南三十里。兩峯延袤數百丈。如斂股然。今

浯澳水寨移置於此。有六勝塔。頗壯麗。相接者曰石湖山。

洋嶼

府西南十里。四圍田疇數百頃。嶼特起其中。又岱嶼在府東南六十里。突起海中。介於石湖北鎮兩山之間。志云。岱嶼相連者。爲白嶼。聳出江中。爲洛陽聖姑北鎮。石湖諸港湍流分瀝之處。而左右多沉沙。遷徙不常。屢爲商舶患。又烏嶼在府東北二十

里。四面潮水環繞。民居輻輳。舊有石路。潮至則沒。行者病之。宋寶祐中始作橋。以通往來。人以爲便。

澎湖嶼

在府東南海中。山形平衍。東西約十五里。南北約二十里。周圍小嶼頗多。自府城東出海。舟行三日可至。又有東西二崁山。亦在海中。自東碇開洋。一日夜可至。其海水號澎湖溝水。分東西流。西達漳泉。東達呂宋。海防考。隋開皇中。嘗遣戍實陳稜。略澎湖地。其嶼屹立巨浸中。環島三十有六。如排衙。居民以苦茅爲廬舍。推年大者爲長。以政漁爲業。地宜牧。牛羊散食山谷間。各務耳。爲記。元志云。三十六島。巨細相間。坡隴相望。有七澳居其間。大約有土無木。土瘠不宜禾稼。產胡麻。綠豆。山羊尤多。居人資海爲鹽。釀秣爲酒。採魚蝦蠔蛤以佐食。土商輿販。以廣其利。貿易至者。歲常數十艘。爲泉外府。至元末。置巡司於此。明初洪武五年。湯信國經略海上。以島民叛服難信。議徙之於近郭。二十年。盡徙嶼民。廢巡司。而墟其地。繼而不逞者。潛聚其中。倭奴往來。停舶取水。亦必經此。嘉隆以後。海寇曾壹本等。屢嘯聚爲寇。官兵大舉。始討平之。萬歷二十年。倭犯朝鮮。哨者云。將侵雞籠。淡水。雞籠密邇澎湖。於是議設兵戍險。二十五年。增設遊兵。春冬汛守。四十五年。倭人犯龍門港。遂有長戍之令。兼增衝鋒遊兵。以厚其勢。其地環衍可二百餘里。三十六嶼之勝。蓋清漳。溫陵。二郡之門戶。但地斥鹵。水鹹澁。常饑多風。稼穡差艱。耳。嶼之正中曰娘宮嶼。從西嶼入二十里。曰茶盤。又十里爲進嶼。卽娘宮嶼。交波平浪息。無淵奔激射之勢。其狀如湖。因曰澎湖。湖面寬轉可里許。深穩可泊。遇南北風。我舟汛守皆頓其中。夷人往往窺伺。以爲窟穴。面爲案山。右爲西安。今各置小城。列銃其中。以爲戍守。名曰銃城。又左爲風櫃。夷人嘗築銃城於此。山高略至七八尺。夷拗其中。上壘土。若雉堞。今毀其城。仍分軍戍守。與案山。西安。相犄角。東爲蒔上澳。猪毋落水。最當東南之衝。夷寇從東南來者。遇風輒寄泊焉。由陸趨娘宮三十餘里。舊有舟師戍守。今更築銃城。以防橫突。又東向爲鑽管港。林投仔。龍門。青螺。諸澳。龍門有原泉。舊爲居民聚落。萬歷三十五年。倭流劫大金。所餘船突犯泊此嶼。西爲西嶼頭。正夷寇出入之道。有菓葉澳。泉甚冽可飲。稍北爲竹篙灣。又西爲蟬仔員。又西北爲了字門。水吼門。非乘潮舟不得出入。今皆有水陸兵戍守。嶼北爲北山墩。有北太武。稍卑爲赤嵌。循港而進。越一澳區。爲鎮海港。壘城於此。又西北爲吉貝嶼。沿海諸山。亂石森列。港道迂曲。非練熟舵梢。不能駕舟也。又北太武。與中墩。稱兩太武。俱湖中最高處。便於瞭望。娘宮稍後二里有穩澳山。頗紆坦。自萬歷三十七年。紅夷一舟闖入澎湖。久之乃去。天啓二年六月。有高文律者。乘戍兵單弱。以十餘船突擁彭島。

遂因山爲城，環海爲池，破浪長驅，肆毒於漳泉沿海一帶，要求互市，欲如粵東香山澳夷例，總兵俞咨皋者，用間移紅夷於北港，乃得復澎湖，議於穩澳山開築城基，通用大石壘砌，高丈有七，厚丈有八，東西南共留三門，直北設銃臺一座，內蓋衛宇營房，鑿井一口，戍守於此，以控制娘宮，然議者謂澎湖爲漳泉之門戶，而北港卽澎湖之唇齒，失北港則唇亡而齒寒，不特澎湖可慮，漳泉亦可憂也，北港蓋在澎湖之東南，亦謂之壘灣，天啓以後，皆爲紅夷所據。

海。

府東南八十三里，府境羣川畢達於此，舊志自城東海道正東行二日至高華嶼，又二日至龜壠嶼，又二日卽琉球國也，海防考郡境濱海之地，東則惠安與興郡莆田接壤，西則同安與漳郡海澄接壤，延袤三百餘里，今分設衛所，以防門戶，而邊海之佛堂

蚶江，兩澳亦肘腋之虞也，又有沙塘

灣在永寧衛城南，或謂之沙頭奧。

晉江。

府城南德濟門外，其上游承永春安溪，南安諸水，匯爲黃龍江，東流至城西臨漳門外，曰笏江，江岸有石高二丈許，卓立如笏，因名，岸傍一山，俯瞰江流，有大盤石，從山腰至麓，與江相接，長百二十餘丈，其穿伏於水底者，尤不可測，宋初邑僧定諸塔於盤石之上，因名山曰石塔山，笏江而下，則爲浯江，流經德濟門外，復東流而北折，環城東南，曰溜石江，又東行至法石，石頭聖姑，達於岱嶼，入於海，亦謂之蚶江，蓋皆晉江之異名矣，舊志晉江之名，以晉南渡時，衣冠避地者多沿江而居，故名，新唐書晉江縣北一里有晉江，開元二十八年，別駕趙頤貞鑿溝，通舟楫，至城下，蓋引江爲別渠，非卽晉江正流也。

洛陽江。

府東北二十里，納境內諸山溪之水，及惠安縣西北之水，流經府東，入於海，羣山逶迤數百里，至江而盡，唐宣宗微時遊此，謂山川勝概，有類洛陽，江因以名，志云，縣境東北諸水注於康溪，達於濼市溪，至於留公陂斗門，其別流爲長溪，受大帽等

山十餘水，又別流爲惠安沙溪，受覆船等山入水，俱至留公陂斗門，匯爲洛陽江，而東入海，留公陂舊名豐谷陂，宋右史留元剛築以灌田，今俗呼陳三壩，洛沈括曰，義同落，九域志作樂洋，然洛陽之稱，其來久矣。

天水淮

府城東南其地曰高洋田濱海苦鹹鹵唐大和三年刺史趙榮鑿清渠作三十六涵納筍渚二水以灌田凡百八十頃取趙姓望名曰天水方言謂淮爲圍俗謂之下圍後陳洪進改曰節度淮宋守曹修睦亦嘗浚治別營三涵以便啓閉志云郡東

南水門舊曰通淮以洩城中滯水先是城內廢河與外濼絕距淮遠宋治平三年夏潦水溢屋廬崩壞越二年守丁疎穴城爲門以通淮疏潢汙納之外河自河注之江江湖通河便於舟楫百貨貿遷皆至於市因名門曰通淮元季拓城通淮門之地在城內改建門曰南薰嘉靖中改門名曰迎春隆慶二年守萬慶重濬城內外溝河立臨

漳南薰通淮三水門城中諸水皆引流入淮合附近羣川達東山渡入於晉江

東湖

城東一里郡境諸湖此爲最大唐時周四十頃後漸壅塞宋慶元六年郡守劉穎濬之積土湖中爲四山置斗門四於西南隅引爲放生池歲久浸廢淳祐三年守顏頤仲復濬又積土湖中爲三山郡人因名湖曰七星湖後復廢明朝天啓五年重濬一

名萬婆湖有萬婆祠○龍湖在府南百里相接者曰虺湖周可二十里志云府南七十里有橫山其溪澗之水匯流爲二湖龍湖大而水綠虺湖小而水赤相傳舊與海通湧沙介其間途別爲湖又有龜湖亦在府東南三十里寶蓋山東北諸溪澗水所匯也嘉靖三十七年倭寇由龜湖突犯安平燔掠而去卽此

煙浦埭

府東南二十里志云堰水曰埭埭九十有四煙浦最大上承九十九溪之水屬袤五六里襟帶南鄉之境出溜石六斗門入於晉江宋時築捍三萬丈斗門四與陳埭斗門共爲尾閘洩水治平二年以後屢壞屢修紹興六年大加修治今猶仍故址

又西南爲陳埭本陳洪進所築受西北吟嘯浦之水及羅裳山諸澗西南出分爲衆港從二斗門以入海○七首塘在府南二十里境內之塘四十有一七首爲最大七首之中盈塘砂塘最大塘中有嶼羣峯皆奇聳唐志晉江縣東一里有尙書塘溉田三百餘頃本名長稔塘貞元五年刺史趙昌置昌後爲尙書民思之因以名塘其塘上接清源山諸坑及東湖之水下流達於晉江府北一里又有僕射塘唐元和二年刺史馬總開濬濬田數百頃總後贈僕射也俗號白土塘今皆廢爲田

清洋陂

在府南陂八十有二。洋陂最大。邑南諸洋俱受溉焉。自煙浦而西。水之小者爲溪。大者爲浦。溪浦分流之際。則築土爲陂。以溉溪旁之田。自南安縣之九溪。至府西南之高溪。凡三十六水。合流數百里而爲陂。自陂而下。爲拱塘。蘇塘。築迴復十餘里。

所溉田千有八百頃。宋熙寧初築。淳熙七年。累石爲埧。以防霖溢。且爲三埧。以洩水。長一百八十丈。廣二丈有咫。修小陂於支流者五。爲斗門於下流者七。陂之南北。增築長埧各三倍。其長之數焉。凡諸港。浦。塘。皆古人填海而成之。所謂閩在岐海中也。

玉瀾浦

府南四十里。匯靈源山。東南諸瀾之水。趨於海。又南四十里有植壁港。匯橫山。以南諸溪澗水而入海。沿植壁而南。有陳坑港。滙井尾埭。烽火埭。西湖。諸水。趨於海。志云。濱海之港。以十餘計。西南隅又有安海港。南安縣境諸溪。亦由此入於海。

圍頭鎮

府南八十里。宋置寶蓋寨。志云。宋淳熙十三年。於泉州城南十里置寶林寨。城東十五里置法石寨。嘉定十一年。以海寇衝突。圍頭守臣真德秀移寶林兵戍圍頭。立寨曰寶蓋。而以法石爲重地是也。元嘗廢。明初徒永春縣。陳巖巡司置於此。改今名。

名。有城。周不及一里。洪武二十年築。又烏滸巡司。在府東南九十里。舊置於安溪縣大西坑。尋徙置此。有小城。亦洪武二十年築。相近又有深滬巡司。元置於府南二十五里。曰港邊巡司。洪武二十年。徙置於此。改今名。并築城戍守。又祥芝巡司。在府東五十里。舊置於東南五十里之石湖鎮。洪武二十年。改徙今處。并築小城。

安海鎮

府南二十里。古名變海。宋初始改爲安。曰安海市。西曰新市。東曰舊市。海舶至州。遣吏權稅於此。號石井津。建炎四年。置石井鎮。紹興二十六年。海寇奄至。鎮官自鎮西偏循東北築土城。疊石爲門備之。後圯。元置石井鎮巡司於此。明初洪武二十

年。徙巡司於同安縣之東坑鎮。仍爲商民輳集處。嘉靖三十七年。以倭亂。鑿石拓城。周五里有奇。爲門四。水關大小凡八。設官軍戍守。亦曰安平鎮。三十八年。倭寇兩攻安平。四十三年。復自仙遊來攻。皆不能陷。萬歷三十四年。移府通判駐此。爲濱海要地。又府東南有石湖鎮。亦曰石湖澳。濱海扼要地也。宋熙寧初。以石湖村爲晉江。南安。同安。惠安。四縣。陸路總要地。置營戍守。後廢。萬歷中。增築石城。并設戍兵。○萬安砦。在府東北洛陽橋傍。與惠安縣分界處。嘉靖中置。府南六十里有潘徑寨。洪武二十一年所

置也。府東南又有吳山等十

五寨。俱洪武中置。隸永寧衛。

晉安驛

府治西肅清門內。元曰清源站。明朝洪武九年改置驛。并設遞運所於其東。以驛兼領。志云。府治西南有清源驛。元置。尋廢。又府南二十里塘市有元置晉江稅務。明朝洪武六年徙於城西南。更爲稅課局。正統初省。十二年復置。嘉靖十六年廢。又有河泊所。洪武十四年置於城南門外。嘉靖間移置城內。○浸羨場在縣東南六十里。產鹽。元置。管勾司。後改司。令司洪武初改爲場。二十五年又改設鹽課司。相近又有泗洲場。亦元置。明朝改。

洛陽橋

府東北二十里。跨洛陽江上一名萬安橋。舊爲萬安渡。頗爲險。宋慶歷初郡人陳龍始鑿石作沉橋。皇祐五年郡人王實等又倡爲石橋。未就會蔡襄守郡。慨然成之。累址於澗。立石爲梁。醴水爲四十七道。長三百六十丈。廣丈有五尺。其後相繼修葺。爲往來通道。嘉靖三十七年官軍敗倭於此。○石筍橋在府西臨漳門外。跨筍江上。宋皇祐初創浮橋。名履坦。嘉祐間重修。改曰濟民。元豐初修飾。曰通濟。紹興間改作石橋。慶元中又造二小石橋相續。以達臨漳門。明朝宣德成化以後屢經修治。嘉靖三十七八年倭賊犯郡。往往嘯聚於此。四十年官兵斷橋拒倭。久之復修築。又順濟橋在德濟門外。宋嘉定四年建。一名新橋。元至元中及明朝成化七年以後相繼修築。長百五十一丈。嘉靖三十八年官兵禦倭於此。又北爲車橋。亦是時屢被焚劫處。

安平橋

在府西南石井鎮。宋紹興中建。醴水爲三百六十二道。長八百餘丈。相近又有東洋橋。亦紹興中建。醴水二百四十二道。長四百三十二丈。又蘇球橋在府東南十里。宋紹興二十四年創建大橋。四計二十三間。又於田廛徑道造小橋百十四間。以通泥淖難行處。長二千三百餘丈。○鳳嶼盤光橋在府東北二十里。舊爲石路。潮至不可行。宋寶祐中建橋百六十間。長四百餘丈。又府東南七十里有陳坑橋。宋淳熙初建。醴水百四十道。鑿路八千餘丈。又普利大通橋在府南三十餘里。宋紹興十二年建。凡百十間。長三百丈。又有玉瀾橋在府東南四十里。跨海港千餘丈。已上諸橋自宋以來歷代修築。

法石寺

府東五里。宋末。蒲壽庚謀據郡降蒙古。少主。至泉城北。不敢入城。駐蹕於法石寺。卽此。

南安縣

府西十五里。北至永春縣百里。西北至興化府仙遊縣二十里。漢治縣地。三國吳置東安縣。屬建安郡。晉改曰晉安。屬晉安郡。宋齊因之。梁爲南安郡。治。隋廢郡。改縣曰南安。初屬泉州。後屬建安郡。唐初置豐州於此。貞觀初州廢。聖歷二年。爲武榮州。治州。尋徙治晉江。縣屬焉。景雲二年。屬泉州。後因之。縣無城。嘉靖三十七年。備倭患。因鑿石爲城。四十三年。復修城濬濠。今城周四里有奇。編戶四十八里。

九日山

縣西南二里。奧衍明秀。溪流演漾。峯巒映發。稱爲名勝。邑人九日登高於此。因名山之岡脈。接晉江縣界。峯巒泉石。其得名者以數十計。又蓮花山在縣西北三里。巒峙平原中。巒開八石。如蓮花然。登其巔。可盡一邑溪山之勝。縣東北又有九峯山。九峯突起。上有西華巖。○雄山在縣南。山勢高大。諸峯皆出其下。故名。縣西南又有烏石山。與晉江紫帽山對峙。巖石奇勝。俗亦謂之烏山。志云。縣西南二十里有谷口山。峭拔森立。其中盤遶如谷。又南爲五峯山。有石室。靈泉之勝。

大安山

縣西北十七里。地勢幽阻。上有樓真巖。巖穴中容數百人。下有泉。歲旱不竭。又大宇山在縣西北二十三里。一名雞筍山。土肥泉甘。多產棗栗。下有翠屏峯。層道巖諸勝。志云。縣西北數里有高田巖。山最高。上有田數十畝。○英茂山在縣西五十里。山勢盤踞數十里。中峯尖而勢差伏。旁二峯兩翼。如鷹振翼。一名鷹山。下有英洋溪。俗名英溪。與安溪縣接界。相近者爲九仰山。衆山九面環仰此山。因名。又因山在縣西六十里。秀銃峭拔。其形如困。航海者常望此山爲標準。又西二十里曰大帽山。廣袤千餘里。頂有巨石九層如帽。與同安縣接界。

海

在縣東南。志云。縣三面距山。惟東南一隅切附海。口有石井。巡司及淘漚。運河。二澳頭。爲守禦之處。

黃龍江

在城南亦曰黃龍溪源自永春安溪二縣匯諸溪之水一東南流一東流同達於縣西雙溪口並流而東至九日山下爲金溪又東達縣治南爲黃龍江遠近諸水皆流合焉折而南匯爲筍江卽晉江上源也○九溪在縣西南二十五里有柏峯山

溪流出焉逶迤而東分爲九派匯爲龍潭下流至晉江縣之安海鎮過安平橋入海

志云縣境諸水俱匯流入晉江縣界爲發源溪葛洲溪俱達清洋陂至煙浦埭入海

壽溪

縣南三十里有覆鼎山溪源出焉縈紆二十餘里溉田三千餘畝又桃林溪在縣西二十里自安溪縣流入界留從効徵時居此下流俱入晉江縣界又洪瀨溪在縣北路出永春德化二縣下流入於雙溪

澳頭鎮

在縣西有巡司正統間置又石井廢巡司在縣西南下坊村宋紹興十四年置北距州城六十里南去石井鎮十五里元移置於晉江安海市又連河巡司在縣南洪武初置二十年徙同安之峯上故址猶存○都巡察在縣城東潘山下宋紹興中

置東距郡城十里元至順間徙於縣西北盧溪橋改盧溪巡司明朝洪

武二十年徙於惠安縣之賴窟嶼又塔日隘在縣西北接永春縣界

唐店驛

縣西南六十里又汰口驛在縣北有汰口山兩山並峙溪流其間宋時有僧建橋於此曰汰口橋以近臥龍山亦名臥龍橋尋置驛志云驛在劉店鄭山之間蓋道出尤溪以避義江之險也後廢

同安縣

府西南百三十里西至漳州府百五十里西北至漳州府長泰縣八十里漢治縣地晉析置同安縣屬晉安郡後廢唐爲南安縣地貞觀十九年置大同場五代唐天成四年王闕置同安縣屬泉州今編戶四十八里

銀城

卽今縣宋紹興十五年創築外環以濠十八年城始就二十五年朱子爲邑主簿與監稅曹沆備城西北寇不能陷其制東西廣而南北隘如銀錠然故曰銀城又城南溪有二十狀如魚色若銅鼓亦名銅魚城慶元紹定間相繼修濬元至正十四年安

溪山賊陷城明年復修治尋圯明朝正統十四年沙尤賊復陷城景泰初因舊址增修成化十八年重修嘉靖三十七年倭奴來寇復增築完固明年積雨城壞賊大至官兵用木柵捍蔽禦却之後復屢經修葺周四里有奇

大輪山。縣城東一里。羣峯自西北環列而來。如乘車張蓋。躍馬奔輪之狀。西南一峯。屹然倚空。名羅漢峯。外又有尊者巖。蒼翠罕。諸勝。又東一里。爲九躍山。山形蜿蜒。如龍之躍者。凡九。因名。又葫蘆山。在城西北。平地特起。形若葫蘆。旁又有四小山。俗呼五

蘆山。○三秀山在縣北十里。三峯秀出。一名仙人掌。爲邑之北鎮。又縣北三十里有斗拱山。相近者曰吳淮山。皆高聳雲漢。又大尖山。在縣西北四十里。高數百丈。與安溪縣接界。

北辰山

縣東二十五里。高聳若拱北辰。上有巖。巖側有十二龍潭。又福船山。在縣東四十里。高秀甲於羣山。一名福泉。接南安縣界。又大羅山。在縣東北五十里。亦曰螺山。巖巒綿亘。亦與南安縣接界。○蓮花山在縣西三十里。峯巒聳拔。狀若蓮花。一名金

寇山。亦名夫人山。又西三十里有三重山。複嶺重岡。高聳千仞。其相接者曰文圃山。南濱大海。下多文士。因名。其山層巒疊嶂。深澗長谷。有龍池巖。及雲嶽。雲峯諸勝。與漳州府海澄縣接界。又四里許曰夕陽山。以在西方最高。遙接落日。而名。志云。縣西五里有西山。形如五虎。

俗亦名五虎山。

五通嶺

縣東七十里。志云。宋幼主避蒙古兵至泉城。聞蒲壽庚之亂。止郡城北法石寺。越城南下。輦。今爲下輦鋪。自下輦鋪過縣東五都龍窟村。有三巨石連接水中。由此登舟。謂之御踏石。又至莊坡尾。是爲五通嶺。路旁二巨石夾峙。高四五丈。文信國題

曰龍門。○泗洲嶼在縣南四十里海中。以在丙方而名。周圍二里餘。檣東有白嶼。周圍四里許。縣東西二溪之水合流經此。兩嶼又南。經處嶼入於海。又嘉禾嶼。在縣西南七十里海中。舊營產嘉禾。因名。一名鸞嶼。一名夏門。廣袤五十餘里。五峯並立。而無壘巖。居其中最高者曰洪濟山。有巖窟。洞石之勝。其最著者有雲頂巖。亦曰留雲洞。又有嶺曰薛嶺。前後居民舊凡千餘家。

浯州嶼

縣東南大海中。陸行至縣九十里。水行五十里。嶼廣袤五十餘里。有山十數。最高者曰太武。狀若兜鍪。隔海望之。若仙人倒地。又有海印巖。石門關諸勝。其地亦名五澳。實番人巢窟也。明初設浯澳水砦於此。嘉靖中倭自浙江舟山南行泊浯嶼。輻

建大震旁又有大擔嶼。小擔嶼。周圍皆數里。嘉靖二十七年。賊攻沙頭奧。衝大擔外嶼。官軍擊却之。賊因流劫北茭。羅浮諸處。又有列嶼。廣二十里。上有大小山數十。其高者曰吳山。牧山。樓山。湖山。而吳山爲最。牧山前有軍營山。後有馬砦。有草湖。昔嘗置場牧馬於此。○大登嶼在縣東南海中。又南有小登嶼。皆廣六七里。其西有鼓

輿與及夾嶼。舊皆有民居。洪武二十年。悉遷入內地。成化以後。漸復舊土。

海。縣南八十里。與海澄縣接界。志云。縣三面距海。而金門。夏門。尤爲險要。今既設兵戍守。又於圍頭諸處分布營哨。相爲應援。所以嚴門戶之防也。其澳頭若列嶼。五通。劉五店。神泉諸處。亦爲防禦之要。而夏門港塔頭澳。其最著者。

東溪。縣城東源出大羅山。東南流。有曾溪。出縣東北三十里。曾嶺下流合焉。繞流至縣城南。與西溪會。其西溪自安溪縣流入。縣西北界。與竹山坑等水合。西折而南。經城西。又繞流至縣南。與東溪合。東流五十里入於海。○葶溪在縣西三十里。出蓮花峯。東

南流。縣南有小同溪。出南安縣南界。洪巖山流合焉。又南入海。又沙溪在縣西北五十里。源出長泰縣。流入境。有三重山水。流合焉。下流入海。縣東四十里。又有蓮溪。其地有鴻漸山。頗高秀。亦接南安縣界。溪源出焉。合縣境諸溪。南折而東流入海。

洪前鹽泉。在縣東東山浮洋中。海潮所不到。每風日晴。明輒有小泉自沙土中出。鄉人取而淋之。可煎成鹽。

高浦鎮。在縣南高浦村。有巡司。志云。本置於縣西積倉坂尾。後移此。相近爲塔頭巡司。舊置於晉江縣之石湖鎮。後移此。又田浦巡司。在縣東南活洲嶼。舊置於安溪縣源口渡。後移此。又有官澳巡司。舊置於德化縣東北之東西圍。後徙於活洲嶼。改今名。

又有峯上巡司。本置於南安縣界之蓮河。後亦移於活洲嶼。相近者爲陳坑巡司。亦自晉江縣石井鎮移於活洲嶼。又南爲列嶼巡司。舊置於澳頭。後亦移此。以上七巡司。郡志云。俱洪武二十年改徙。各築城爲守禦。又有葶溪巡司。在縣西四十里。正統元年

置。○石鼓寨在縣西南。志云。宋靖康間築。以禦山寇。故址尙存。又有煖湯。東山後溪。大尾洲等寨。俱宋靖康紹興中置。後皆廢。

浯嶼寨

在縣東南水砦也。志云：洪武初，江夏侯周德興置砦，與福州之烽火，興化之南口，爲三寨。景泰間，復增漳州之銅山，福州之小埕，共爲五寨。寨置於浯洲嶼太武山下，實控泉州南境，外扼大小擔二嶼之險，內絕海門月港，與賊接濟之奸。成化中，或倡孤島無援之說，移入夏門內港，仍曰浯嶼寨。山奧崎嶇，賊輕舟入淺，我舟大難以轉舒，每失事機。舊浯嶼寨而不守，番舶得據爲窟穴。嘉靖四十二年，議復置於浯嶼，增兵戍守。近志云：浯嶼寨今移於晉江縣之金釵山。○劉五店澳頭寨在縣東，又東有牛澗等寨。志云：縣西又有青峙山等砦，西南有下崎等寨，其屬於官者十四，而民間自爲戍守者不可勝計。皆倭患時置，又鎮南關在縣南，舊爲鴻店亭，後置關於此，爲海濱扼要之地。

大輪驛

在縣治西。宋時爲大同驛，在城東朝天門外。元移今所，更名同安。明朝洪武九年改今名。又深青驛在縣西五十里，宋名魚字驛，在安民鋪側。元移今所，更名明朝因之。又浯洲場在縣東南，洪武二十五年設鹽課司。又河泊所在縣西南，亦洪武初置。○石菌鋪在縣南海濱，爲烽墩之所。嘉靖四十年，倭賊自漳州府長泰縣突犯同安，鄉兵襲擊之，賊竄石菌海濱是也。其地與潘徑、陳坑皆相近，有戍兵哨守。又王倉坪在縣東南，嘉靖中，倭賊自興化府仙遊縣突趨同安，參將戚繼光追至王倉坪，倭奔即此。漳州

惠安縣

府東北五十里，西北至興化府仙遊縣百餘里。唐督江縣地。宋太平興國六年，析置惠安縣，屬泉州。元因之。明朝嘉靖三十一年始議築城，禦倭三十三年城成。三十七年，倭寇攻城不能陷，明年復修築。未幾又增城濬濠。四十一年及隆慶元年以後，屢

經葺治，城周五里有

奇，編戶三十五里。

螺山

在縣治北，形如螺髻，舊名羅峯。云羅隱嘗寓此。縣城南又有樓山，迴拱縣治。一名留山，亦曰城樓山。○大帽山在縣西北四十里，屹立千仞，雄峭盤鬱，絕頂廣百餘丈，有泉泓然。其西南曰三髻山，絕頂拔起三峯如髻，有仙人橋橫跨兩崖，崖甚深杳，又有

靈湫亦深廣。志云：縣北二十里有東平山，一名北山，羣山連屬，平有平原三四里，復起一峯，因名。又東南數里曰臥龍山，盤曲回復，中起一峯，如龍首之昂，聳。又南曰龍盤山，山勢蟠繞如龍，與螺山相峙。

九峰山

縣南二十五里，羣峯爭雄，其數有九。又城山在縣西南三十餘里，東連大海，西接長江，延袤如城。志云：縣西數里有盤龍山，七峯聳起，盤曲重疊，因名。○錦田山在縣南四十里，下有腹田萬頃，五代時豪民黃氏居山下，亦曰黃田山。志云：縣南有青山，山面大海，王閩將張耦嘗立寨於此，以禦海寇。又縣南濱海有鴨山，嘉靖中倭攻惠安，不克引去，知縣林咸擊之於鴨山，伏發敗死，今有鴨山埭。

崑崙山

縣東北三十里，勢高聳，望之若祥雲，南有伏虎巖，清泉石室，最爲幽勝。又南爲靈鷲山，一名烏石山，又五公山，在縣東二十里，相傳蕭梁時有五僧隱此，一名下江山，以南唐保大中江盈家於山之東麓也。○松洋山在縣東南三十餘里，高大甲於縣境，諸山爲一方巨鎮，山北有洞，亦曰松洋洞，洞口僅容一人，中寬廣容二三百人，宋元之季，民常避難於此。又靈瑞山在縣南三十里，橫列縣治之陽，若屏嶂然，中有孤峯特起，曰靈瑞巖，麓有龍泉，一名龍泉山。志云：山北十里有峯崎山，又北三里爲輞川山，有居民數千家。

覆船山

縣西二十五里，以形似名，一名緞劔山，唐陳緞葬親山下，因更名，有巖石諸勝，又南爲鶴堂山下，瞰洛陽江。

獺窟山

縣南五十里，大海中，宋開禧間，僧道詢運石成橋七百七十間，直渡海門，約五里，潮平則沒，半落則通人行，至今籍其利，亦曰獺窟嶼，有巡司，又大岫山在縣東南海中，山頂有洞，由小石門入丈餘，折而右，轉巨石如屏，可蔽內外，容數百人，一人持戟守門，千百人攻之不可入，明初居人避倭亂於此，寇不能攻，嘉靖三十八年，倭寇犯郡，繼而自祥芝、石湖、烏滯，分道出海，參將王麟追敗之於此。○淨山亦在縣東南海中，一名尖山，圓淨尖秀，下瞰東溟，上多怪石，如水榭射狀，最高而峭拔者三峰，登之可

以觀日出。又小岬山在淨山東十里。北對黃崎山。南控大岬山。邑境諸山之東趨於海者。至此三山而止。志云。黃崎山在縣東南三十里。三面環海。鹵氣吹盪。不生草木。宋時產鐵鑛。置爐煮鍊於此。今廢。亦名揚旗山。以遠望勢如立旗也。又有圭峯。在縣東北四十里。與黃崎山對峙於海門。又東北海中有樂嶼。舊有民居。明初遷於內地。○岱嶼在縣南大海中。舟楫必經之地。常有戈船守此。

海。

縣東南兩岸至海。皆四十五里。北自樂嶼。南屬岱嶼。並海嘯凡百餘里。支海穿達。上接溪港。不可悉計。又東與興化府莆田縣接界。邑志。縣西北跨山。東南皆際海。永樂間。島夷爲患。始築沿海五城。曰崇武。曰賴窟。曰小岬。曰黃崎。曰峯尾。以爲屏障。今皆有兵守。成。

洛陽江。

縣西三十里。與晉江縣分界。縣境山溪之水。多滙流於此而入海。亦曰洛陽港。志云。縣西有沙溪。出三髻山。合西南諸溪。亦曰白巖溪。入洛陽江。○峯崎港在縣東五十里。縣境驛坂諸溪發源大帽以東等山。滙流入峯崎港。以達海。又前林港。在縣東南四十里。縣南有金山等溪。發源九峯諸山。下流會羣溪。東至東井埭。出前林港。以入海。縣東北四十里。又有添崎港。其上流爲證果。真如等溪。悉由此入海。

龍津溪。

在縣城南。源出東平山。繞流經城西北數里之太白峯。卽蓮花山也。至龍津陂。繞縣治前樓山之陰。又東達下謝溪。入王孫埭。其上游爲下曾。黃坑等溪。俱在縣西二十餘里。南流由埭以入海。又傳埭在縣東北。其上流爲西充溪。滙東北諸溪水出傳埭以入海。志云。西充溪在縣東北四十里。

輞川鎮

縣東北十里。阻山負海。民居繁密。嘉靖三十七年。縣屢被倭患。因議城之。四十一年。城始就。周四里。輞城相倚角。又峯尾鎮。在縣東北四十餘里。舊名沙格巡司。在縣東四十里。洪武二十年。江夏侯周德興改置於烽尾村。築城爲守。又小岫巡司。

在縣東南小岫山下。本名小兜巡司。卽今崇武所也。後徙置於此。改今名。又黃崎巡司。在黃崎山下。本置於德化縣東北清泰里。曰清泰巡司。後改徙於此。縣南又有輞窟巡司。在輞窟山下。本南安縣之盧溪巡司。後改徙焉。諸司皆有城。俱洪武二十年築。又塗嶺廢巡司。在縣北二十里塗嶺山北。元統二年置。明朝洪武二十年廢。故址猶存。

白水寨

縣北五十里。白水舖南。一名陳同寨。其地甚峻。元末寇亂。鄉人築壘爲寨。正統十三年。鄰境盜起。復藉此控禦。邑人呼爲寨。嶺又東坑寨。在縣西北志云。日曝嶺距縣三十五里。又西五里卽東坑也。路入仙遊地。亦險仄。元季兵亂。邑人避難於此。築寨自衛。今與白水寨俱爲北境保障。○虎窟砦在縣西南山谷中。崇山夾峙。狹徑僅通。正統末置砦。以禦沙汀之寇。遇亂輒爲戍守處。又青山寨在縣東南四十餘里。洪武二十一年置。隸崇武千戶所。

錦田驛

縣治西南一里。舊名皇華驛。在城東。宋太平興國中。建元元貞間遷今所。更名龍山驛。兼置龍山站。洪武八年改今名。又西爲遞運所。以驛兼領。又河泊所在縣東三十里輞川澳。洪武十六年設。後爲海潮漂圯。正德中重設。又惠安場鹽課司。在縣東南三十八里。元設管勾司。尋爲司令司。明朝洪武十五年。爲轉運公司署。二十五年。改置今司。轄廣運等倉埕凡八所。屬鹽運分司。○瓊田延壽橋在縣東五里。宋建爲梁百二十九間。長二里許。自元以來增修。爲縣南諸溪滙流處。東出輞川入海。

安溪縣

府四百五里。西南至漳州府二百三十里。西北至漳州府漳平縣二百四十里。東北至永春縣百里。唐南安縣地。咸通五年置小溪場。五代周顯德二年。南唐置清溪縣。屬泉州。宋因之。宣和三年。改爲安溪縣。今編戶十六里。

清溪城

卽今縣故小溪場也。南唐保大十三年。詹敦仁監場事。請於清源節度劉從効曰。小溪西距漳汀。東濱溟海。地廣二百餘里。三峯玉峙。一水環通。黃龍內顧。以騰驥。朱鳳後翔。而飛翥。土之所宜。桑麻穀粟。地之所產。麋鹿禽魚。民樂畊。治有銀鐵。稅

有竹林之征。險有溪山之固。地實富饒。足以置縣。從之名縣曰清溪。宋曰安溪。舊無城。嘉靖三十九年。倭自仙遊。永春突犯。四十一年。始議築城。四十四年。城始完固。周三里有奇。

鳳山

縣治北。縣之圭山也。以形似名。一名鳳髻山。又名展旗山。治南曰黃龍山。與鳳山對峙。一名南山。亦曰登高山。下有黃龍津。龍津橋跨其上。亦名龍津山。○黃蘗山在縣南十五里。一名午山。亦曰南山。爲邑中衆山之宗。深林邃谷。饒筍蕨稜稻。山半有五

峯巖。亦曰頭陀巖。又南二十餘里曰浪來山。謂山勢如浪也。山半爲閩苑巖。一名閩山。

志云。縣西南二十餘里有龍塘山。嶺曰龍門嶺。石壁夾峙。舊有龍門驛。道出同安縣。

翠屏山

縣北五十里。高出羣峯之上。亦曰大尖山。其東爲小尖山。又陳五郎山。在縣北三十里。最高。晴明可以望海。又覆鼎山。在縣北八十里。以形似名。北接永春縣界。嘉靖二十六年。賊陳日暉據山陰。出沒大爲民患。尋討平之。○後洋山在縣西北五十

里。最高。下爲平疇。一名大洋山。又西北六十餘里有朝天山。以勢若插天而名。上有天寧巖。又西北曰鐵鑛山。產鐵。志云。縣西北八十里有佛耳山。其山峭絕而高大。可耕可廬。一名佛天山。又西北二十里有石鼓山。其相接者曰石梯嶺。巨石盤回。凡五十餘級。

磨鎗嶺

縣西百里。山嶺險巖。路通漳州府長泰縣。志云。自嶺而西南爲銀場。卽龍溪縣界也。又九龍崗。在縣西北九十里。嘉靖二十六年。盜陳日暉據覆鼎山。大小尖。白葉坂。九龍。諸崗爲寇。出沒泉漳汀之交。亘百數十里。官兵尋破之於白葉坂口。遂追擒

之。白葉坂與九龍相近也。○古陵坡在縣東。正統十三年。鄧茂七由德化。永春。安

溪。冠泉州。知府熊尙逆戰於古陵坡。敗死。或曰坡在南安縣境內。近泉州城南。

藍溪

在縣治南。源出縣西北九十里北巖諸山。東南流。合羣山溪之水。至縣西南五里澳下渡。始通小舟。又東至龍津橋而流益大。溪色深碧。故曰藍溪。又東南流。入南安縣界。至珠淵渡。達雙溪口。爲黃龍江之上源。志云。溪自縣治西而東。下流接南安界。羣

灘錯列。凡十餘處。爲行舟之阻。溪之別派則一出縣西九十里九峯山。逆流而東。北入龍溪縣之九龍江。一出縣西北七十餘里之同發山。逆流而西北入長泰縣。

湖頭溪

在縣治西北。源出覆鼎諸山。引而南。諸山溪水皆會焉。至縣北三十餘里。有馬上灘。淵灘。當溪阻石數百丈。水從石罅中出。正統間。始鑿石通舟楫。又有下湖溪。出銅鼓山。卽同發山也。又有龍潭溪。出縣西北五十里天馬諸山。合諸山水並流。匯湖

頭溪。歷數灘。至縣治西北。爲吳浦。渡會於藍溪。蓋衆水之宗矣。

源口渡鎮

縣西北五十里。舊有巡司。後廢。正統五年復置渡。卽龍潭溪渡處。○白葉坂寨在縣西北八十里。嘉靖二十六年。以山寇出沒。置圍以石城。撥軍戍守。寨在崇山密林間。嵐氣最甚。尋廢。又縣境有東嶺等隘。十有一。俱正德以後置。志云。縣

西八十里。有大深隘。宏治四年。賊溫文盛立寨山上。正德十年。建爲隘。路出漳平。又打鼓隘。在縣西北五十里。打鼓嶺下。正德十六年。建嘉靖三年。賊新大總嘯聚於此。又桃舟隘。在縣西北百里。西通長泰。北接永春。盜賊往來之衝也。又縣東南數里有故大寨。北鳳山之半。有故縣後寨。皆唐季遺址。後廢。

永春縣

府西北百二十里。東至興化府仙遊縣百十里。南至安溪縣九十里。西北至德化縣五十里。本南安縣地。唐長慶二年。析爲桃林場。五代唐長興四年。王閩置桃源縣。晉天福初。閩又改爲永春縣。仍屬泉州。縣無城。嘉靖初。始建西南北三門。以禦漳汀之

寇。三十九年。爲倭所毀。尋砌石爲垣。明年。又爲賊陷。因築城。周不及三里。四十一年。城始就。賊來犯。不能入。今編戶十四里。

大鵬山

縣城北。形如飛鵬。乘絕。頂三峯。秀出雲表。稍西南爲大羽山。重岡疊嶂。若鳥張翼。下趨平處。結爲縣治。縣之主山也。縣東南三里。曰花石山。嘉靖二年。官兵拒賊於此。○雙髻山在縣北十里。從結二峯。若雙髻。一名朋山。上有仙人池。又北數里曰

高嶺山形勢高聳。遠出衆峯之上。爲一邑巨鎮。又北爲高嶺山。亦高壓衆峯。其頂平夷。志云。縣東北十餘里有齊雲山。高接霄漢。又有三貫山。三峯秀拔。勢貫雲表。

雲居山

縣西二十里。卓立嵯峨。若趨若伏。雲常居之。其東爲東山。俗呼高峯。又周山在縣西南二十里。形勢雄壯。綿亘三十餘里。又西南五里爲達理山。峭拔蒼翠。亦名筆架山。茂林清泉。六月如秋。○陳巖山在縣西二十六里。中峯尖聳。東西二峯。屹立

謂之二壘。昔有蕭姓者。開路於山左。通龍巖。尤溪二縣。憑虛架石。下瞰深澗。過者股栗。相接者曰洪步山。長亘數里。高聳凌空。巍然獨秀。若步武狀。又鷄母岫山在縣西北六十里。嘉靖初。官兵敗汀漳賊於此。山之東南十餘里曰河澗山。盤迴起伏。凡九十九峯。一名大池巖。相近又有曠山。產鐵。志云。縣西北二十餘里曰高麗山。屹立如屏。絕頂有道場。寨可容萬人。

蓬萊山

縣東北二十里。迴環秀麗。勝若蓬萊。相對者曰錦繡山。亦高勝。本名鬼岫。宋光宗改今名。又天竺山在縣東北三十里。極高峻。接南安。仙遊二縣界。又東北有四臺山。四面各有一山。樂山居中。亦曰五臺。志曰。樂山周圍四十里。昔時嘗聞音樂聲。因

名。○苦竹嶺在縣東。接仙遊縣界。嘉靖四十年。倭自仙遊來犯。義兵拒却之於此。

桃溪

縣治南。其源出縣西北六十餘里之雪山。山高峻。多積雪。接德化縣界。逶流而南出。經羣山間。曰仙華。陳巖。埔兜等溪。又東折爲湫溪。磁窰等溪。至石鼓鼓。始通舟楫。流經縣治。爲縣前溪。後曲折流。爲留灣溪。又東南出。歷馬甲。鍾山。山門。南澗。滑石等灘。

皆險崖激浪。至縣東十五里之西涵灘。則桃溪咽喉也。宋開寶三年。令林滂以馬甲諸灘險阻。鑿之以通舟楫。自西涵而下。出南安縣水江村。合於雙溪。卽晉江上源也。志云。溪自雪山山下。至西涵。出水江村。凡九十餘里。舟楫通行。自石鼓至水江村。凡三十里。其衆水之會於桃溪者。先後凡十四支。又有桃溪山。在縣西北二十餘里。舊經云。桃溪之水。蓋以山名。

黃田溪。縣西北百五十里。有岱山。北接德化縣界。溪源出焉。南流有碧溪諸水。出羣山中。先後來會。入安溪縣界。又洞口溪。在縣西北五十里。亦合諸溪水入安溪縣界。下流合於藍溪。○小姑水在縣西二十三里。流經縣西南二十里。西向山分流東南注。

至南安縣北塔口村下流。

合東關水。卽桃溪別名也。

南峯寨。縣西北百五十里。相近有占仔碧溪等寨。志云。碧溪寨。宋紹興二十年。州將陳敏討捕山寇。以其地控漳。泉汀建之衝。因置寨。後復置邱店寨。後皆廢。又有蝴蝶金雞等砦。俱據山爲險。又石鼓寨。在縣西北五十里。相近有陳坑寨及山中上下二寨。龜

洋馬頭寨。縣西二十餘里。曰陳巖寨。因山以名。又西北爲道場寨。○仙亭寨。在縣西南二十餘里。後頭山上。寨容百人。又縣西二十里。石壁山西有銀瓶砦。險峻。壁中有清泉。元末所建。

雙魚寨。縣治南留灣山上。山亦名雙魚山。砦因以名。又王山寨。在縣治東北懸鍾山下。後又陳占仔寨。在縣東南石谷山。相傳昔劇盜陳占仔據此。鱗石巖巖。恃以爲險。縣東十里。又有湖安山砦。山上有屯田百畝。卽占仔砦門戶也。相傳賊將昔屯此。又縣西

北二十五里。曰白鶴砦。在白鶴山頂。峭削壁立。崖石環障。清泉四出。縱橫各一里許。亦元末建。正統十四年。修築。鄉人避兵於此。賊不能陷。又有石壁覆船等山寨。與白鶴相近。志云。縣共有二十七寨。皆多事時戍守處。

樟坑隘。縣西北百六十里。三台山下。路通漳平縣。又有任田隘。在縣西北岱山下。路出尤溪。又西北東山下。有吳畚隘。路出德化。尤溪及延平縣。又白巖山下。有上畚隘。亦出德化。尤溪縣西百五十里。東湖山下。曰白山嶺隘。路通安溪縣。自任田以下四隘。

皆嘉靖二年置。以備汀漳之寇。○蘆地隘。在縣西北五十里。新犁山下。亦嘉

靖二年建。又縣西北二十里有山中隘。其南有許平隘。宋開慶元年築。今廢。

上達隘。縣西南二十餘里。白芒坑山後。相近有高平隘。路出安溪。打鼓嶺。俱嘉靖初築。以拒賊。○白隔隘。在縣東北三十里。路出仙遊。其相近有梅坑石獅山等隘。縣北十餘里。又有塔嶺隘。東北十餘里。曰苦竹隘。志云。縣城東南有泥門隘。東十餘里有東

關隘。縣西北二十五里。又有蘇坑、英山隘。久廢。嘉靖初復置。縣境之隘。凡二十有二。其因嘉靖初寇亂而置者。蓋十有九云。

德化縣

府西北百八十五里。東至興化府仙遊縣百三十里。西北至延平府尤溪縣二百四十里。北至福州府永福縣二百五十里。西南至安溪縣二百二十里。本唐福州永泰縣地。貞元中析置歸德場。五代唐長興二年王閩升爲德化縣。屬長樂府。漢乾祐二年南唐改隸清源軍。又割尤溪縣二鄉益之。宋仍屬泉州。舊無城。嘉靖三十六年創築。周四里有奇。三十九年改築以禦倭。縮四之一。四十三年城東爲水所毀。尋復葺治。今編戶十三里。

龍潭山

縣治東北。山勢峭拔數千仞。蜿蜒如龍。縣圭山也。宋紹興初令吳崇年鑿山築寨以禦寇。其西有大旗山。峯巒迴顧。環拱縣治。勢如展旗。又治南一里有雙魚山。兩峯並聳。爲縣之案山。○瓊山在縣治西南。一名園山。以圓秀如高廩也。相近者曰雪

山。峯巒峻拔。高聳雲際。冬時積雪。數日不消。又西南有斤山。一名蓋竹根山。高五里。廣十里。峯巒尖秀。如卓筆然。縣北三里又有繡屏山。層崖峭壁。高秀若屏。志云。縣西四里爲五華山。一名根山。上有五峯。狀如蓮花。縣南三里有鳳翥山。一名高舉。又名鶴山。高秀出諸峯之上。舊有浮圖。今廢。又南曰羅城山。一名豪城山。山形如覆釜。四圍峭峽。頂上平坦。舊爲寨基。

戴雲山

縣西北五十里。高聳霄漢。雄跨十里。嘗有雲氣覆之。巔有池。深不可測。分爲九派。下注九溪。一曰張巖。二曰盧地。水皆北流。三曰雙芹。四曰馬槽場。五曰上洋。六曰上雲。七曰中興坑。水皆東流。八曰東埔。九曰李山。水皆南流。灌注縣境。又西里許曰

太湖山。盤踞數里。形勢峻拔。四面崔嵬。上有奇峯羅列十二。山巔平廣數丈。內有池丈餘。影涵太虛。一碧如鏡。因名太湖。俗曰龍湖。又名青草湖。山形如船。亦名飛船山。○大帽山在縣北七十里。脈自九仙山來。綿亘數十里。卓起大峯。狀若大帽。志云。九仙山在縣西北百里。廣袤峻拔。甲於諸峯。俗傳嘗有九仙隱此。又蓮花山在縣西北八十里。五峯攢簇。高聳峭峭。又西北有鍾山。四面俱石壁峭峻。形如覆鍾。中有巖洞澗壑之勝。縣西北百餘里爲雞髻寨。山地甚險阻。峯如雞髻。中有石門隘。

虎頭山

縣四百五十里。有古寨。周圍七里餘。其中泉石如畫。外極高峻。避兵者依之。萬夫莫敵。相近又有一山。亦甚高峻。但乏水。昔有避賊於其上者。賊欲久圍以困之。有一女子取酒浣衣。以示賊。賊疑有水。因解圍去。俗呼酒盪山。又西有金雞山。山陰

有金雞寨。又西有大尖山。峭峽

奇險。聳峙尖削。有泉出其頂。

均山

縣東北百八十里。山勢峭拔。延廣數十里。相近者曰飛仙山。兩峯角立。懸崖峭壁。瀑布飛流。高數千仞。縣東二百里。又有九座

嶺。嶺下有隴龍寨。宋元符中建。志云。縣西五十里。

有湖嶺最高峻。其水分西南二流。皆入於漣溪。

漣溪

在縣北。即戴雲山水也。九溪之北流者。凡二。合爲赤水。西溪東流。迤邐爲上湧。下湧。山茶。曾坂。百葉。湖頭。李田。湧口。等溪。益折而東北。距縣百八十里。曰九寶溪。又東北七八十里。爲螺潭。入永福縣界。其五溪之東流者。二溪合爲龍潭。爲左溪。合於九寶

溪。其上洋之水。過涵口。至縣東北百七十里之石獅渡。上雲之水。爲驟溪。過焦口。亦入石獅渡。中興坑之水。爲林翰坑。會於縣前

溪。其二溪之南流者。合流爲白泉。石山。蘇溪。塗坂。等溪。經城西。爲西門溪。折而東流。爲縣前溪。回環曲折。俗謂之腰帶水。總名曰

漣溪。又東北爲十二輪溪。與上洋。上溪。二水會於石獅渡。東北與張巖。盧溪。雙芹。馬槽。四

水同入永福界。爲大樟溪。即九溪之下流也。境內山溪之水。皆分流環注。並入於漣溪。

丁溪

在縣南。源出瓊山。匯九漣。諸溪。經歐山溪。大坑溪。而匯於縣前之漣溪。相傳溪本南流。不與漣會。宋元符中。大雷雨。水流迴轉。縱橫若丁字。因名。又寨前溪。在縣西。源出湖嶺。南流者入李山溪。西流者自尤溪轉入永福。合大樟溪。志云。縣西南百八十里

有下平溪。入尤

溪縣之大溪。

官井關

縣東北二百六十里。又湯尾關。在縣東百里。其地有湯嶺隘。亦曰湯尾寨。又巖市關。在縣西北百八十里。平盧關。在縣東北百四十里。其地又有石門隘。俱宋元間置。以防山蹊支路。鹽丁出沒。沙尤諸縣間也。今仍舊。○蘇坑隘。在縣東南。又有劇頭。

蓋福洋。上滌等隘。俱通永春及仙遊縣。又油竹隘。在縣西北二百六十里之大官嶺。路通尤溪。其東北曰蛇嶺隘。道出永福。志云。縣北百里有龍牀。赤嶺等隘。俱通尤溪。其西為伏虎隘。元至元十三年。以地接延汀二郡。撥軍戍守金廢。又焦嶺隘。在縣西北百

八十里。路亦出尤溪。其地即小尤中。國也。嘉靖三年。官軍殲汀漳賊於此。

高鎮

在縣東北百四十里。舊有巡司。萬歷末革。志云。縣有三縣巡司寨。在縣西三十里五店村。宋祥符間。以左嶺為五州所轄。因置寨於此。管德化。永春。安溪三縣。元豐三年移此。元廢。○上壘驛。在縣北。宋置。志云。自宋以前。郡城西北取延建路。道南安澄

口驛。永春桃源驛。德化龍潭驛。上壘驛。抵尤溪縣。逶迤經西芹。至延平。蓋以避大義江之險。然山嶺高峻。卒不可行。自宋以來。西北之驛道遂廢。

附見

泉州衛

府治西。洪武元年置。

永寧衛

府東南六十里。宋乾道八年。置水澳寨。元為永寧寨。洪武二十年。改建今衛。二十七年。以衛瀕海。乃築城以備倭。周不及五里。領守禦千戶所五。

守禦福全千戶所

府東南八十里。北距衛城二十里。洪武二十年。置有城。周不及四里。後以時修葺。領潘徑寨。海防考。所西南接深滬巡司。與圍頭峯上諸處。並為番舶停留避風之門戶。哨守最切。福全深滬。有備寇不能犯矣。

守禦中左千戶所

在同安縣西南五十里。本名嘉禾嶼。爲廈門海濱。洪武二十七年移永寧衛中左所官兵於此。築城戍守。周二里有奇。永樂正統以後不時修築。轄縣西南東澳伍通二營。天啓二年紅夷突犯。總兵徐一鳴據城守拒。賊敗却。海防考所西有白石頭澳。嘉靖三十八年官軍敗賊於此。今爲島夷出沒之所。有兵戍守。

守禦金門千戶所

在同安縣東南五十里。本潯州嶼。洪武二十年置。築城周三里有奇。轄縣東劉五店等五營。縣西洪山等三營。海防考所東有官澳巡司。相近又有料羅烏沙諸處。皆番舶入犯之徑。其控扼要害。則在官澳金門。轄縣西高浦大圓堂馬鑾等三營。海防考所西有松嶼。與海澄縣之月港相接。爲濱海要衝。

守禦高浦千戶所

在同安縣西南六十里。洪武二十三年徙永寧衛中右所官兵戍此。更今名。築城周不及三里。在惠安縣南七十里。西去府城八十里。宋元豐二年以海寇猖獗。置小兜巡司。巡徵管江同安南安惠安四縣沿海地。元仍置巡司。明初因之。洪武二十年江夏侯周德興經沿海地方設立城池。移司於小岞。而置千

守禦崇武千戶所

戶所於此。城周四里有奇。後不時修築。嘉靖三十七年倭賊來犯。官軍禦之。賊不能陷。已上俱屬永寧衛。

漳州府

東北至泉州府二百七十里。東南至海二百里。西南至廣東潮州府五百有五里。西北至汀州府六百三十里。北至延平府七百三十五里。自府治至布政司七百里。至京師七千五百二十五里。

禹貢揚州地。周閩越地。秦屬閩中郡。漢屬會稽郡。後漢因之。晉屬晉安郡。宋齊仍舊。梁屬南安郡。隋屬

泉州。大業中屬建安郡。唐初仍屬泉州。

今福州也。

垂拱二年始置漳州。

以漳水爲名。治漳浦縣。志云。州境自隋以來地荒人稀。未嘗王化。儀鳳三年寇陳謙等連結諸蠻。使

饒州。翊府左郎將陳元光討平之。始開屯列成於漳水北。且耕且守。章請於泉潮。開建一州以抗嶺表。從之。即屯所爲州云。天寶初。曰漳浦郡。開元二十二年。州改隸嶺南。至是還隸。乾元

初。復爲漳州。

是年州徙治龍溪。志云貞元二年徙。

五代晉開運三年。南唐改曰南州。

以刺史董思安父名章。請改也。

宋仍曰漳州。

亦曰漳浦郡。

元曰漳

州路。明初曰漳州府。今領縣十。

府雄據海濱。巖嶭嶺表。山川清秀。原野坦平。爲閩越之南屏。控島夷之北戶。志云。福興泉爲八閩之藩。離而漳南又爲兩廣之唇齒。備禦不可不早矣。

龍溪縣。

附郭。本晉安縣地。梁天監中。析置龍溪縣。屬南安郡。隋屬建安郡。唐屬泉州。開元二十九年。改屬漳州。乾元二年。始爲州治。今編戶百有二里。

漳州城。

即今府城。唐遷郡治此。未有城。宋築土爲子城。周四里。咸平二年。環城濬濠。祥符六年。加濬西濠。又於西南隅鑿水門。通潮汐。其外城僅樹木柵。周十五里。紹興中。郡守張成大毀子城。并撤外城。三面築以上。獨南面阻溪爲固。而子城之濠皆在城

內。嘉定四年。以石甃城東面。紹定三年。復徹西南北三面。城周十七里有奇。皆建樓櫓。浚河隍。淳祐九年。增修。元至正二十六年。陳友定使其屬縮城三面。惟南面仍舊。周十二里有奇。浚東西城濠。南臨大溪。北依山溝。障有陸門。四南面爲東西水關。二明初。因舊城修飾。正統七年以後。

屢經葺治。規制一因舊址。

蘭水廢縣。

在府南。舊志云。梁所置也。屬南安郡。隋屬泉州。開皇十二年。并入龍溪縣。

紫芝山

在城西北隅。脈自天寶山來。蜿蜒起伏三十餘里。至此一峯聳拔。一名望高山。南麓爲登高山。郡城繞焉。頂有咸鎮亭。洪武中建山之東爲日華萬松諸峯。禪月降齋等山。其西爲淨安峯。騰龍起鳳諸山。志云騰龍山本名龍亭山。在城西南隅。平地特起。奇石攢湊。俯瞰溪流。相傳昔有龍騰溪中。因建亭溪上而名。其相峙者曰起鳳山。本名高亭山。與日華諸峯綿亙連絡。繞城內外皆紫芝之支隴也。又城南隔溪曰丹霞山。一名南山。又六里曰南巖山。峯巒奇秀。延袤數里。怪石錯列。其最著者曰石獅巖。寶月巖。玉泉巖。羅漢峯。白鹿泉。諸勝。○名第山在城南十里。本名天城山。以唐元和中。郡人周匡物初登進士。賜名。又城西南十里有員山。前後望之分十二面。因名山有琵琶坂。上爲石池。

天寶山

府西三十里。五峯峭立。周百餘里。郡之望山也。宋大中祥符中。山下溪產大珠。入貢。因名。上有寶巖洞。芙蓉城。百丈泉。諸勝。山之北接玳瑁嶺。高百丈。亘三十餘里。接長泰縣界。爲郡北之屏障。俗曰大帽山。其枕天寶西麓者曰新嶺。石磴盤迴十餘里。路通安溪。龍巖。漳平三縣。舊設亭障其上。舊志元末有蔡者。於山腰開新嶺。一名蔡公嶺。通道龍巖。安溪。卽此。又西爲揭鴻嶺。極高峻。在郡西北四十里。輿地志卽古蔡岡嶺。東南之揭。二越之基也。漢唐時西北向長安。山安溪大田。以行。今故道廢。其下有唐屯軍營故址。上有營頭亭。相傳唐陳元光屯兵處。

文山

府東二十里。北臨大溪。三面通潮。或謂之觀音巖。其右爲水頭山。聳拔奇秀。濱於大溪。逾溪以北曰鶴鳴山。一名石壁山。又分岐而北者曰岐山。名山記鶴鳴岐山連峙二峯。延袤十里。巒秀於龍江之上。巖壑類皆奇勝。中有千人洞。洞口狹而暗中甚寬。朗容千人。黃巢之亂。居民多避難於此。○鳳凰山在府東二十五里。志云在岐山右側。與文山對峙。中有萬松嶺。舊名馬岐。卽郡之孔道也。元末陳友定破漳人於此。郡城遂下。又龍潭山在府東南二十五里。有龍潭。飛泉百尺。旁爲鳧翠山。雙峯如削。俗名魚刺山。一名朝天鯉魚山。

銅鉢山

府北二十里。山勢綿亘十餘里內。一峯中窪而外圓。其形如鉢。又北十里為天公山。山高秀。有瀑布泉。志云。府北四十里有石蟻山。尖聳千仞。頂石多粘蟻殼。因名。南下小山。纍纍蓋天。寶山來脈也。又龍山在府北十里。產茶。○鼎山在府東北二十

五里。山高。大圓如覆鼎。絕頂有膺。俗呼鼎膺山。上有龍秦巖。以巖接龍溪。長泰二縣交也。一名侯作巖。又仰孟山。在府東四十里。高廣。嶒拔頂凹如盂。上有田池。又有仰孟巖。又白石山。在縣東六十里。一名鶴石山。中有石磴。容千餘人。

華峯嶺

府北五十里。一名龍頭嶺。高千餘丈。累磴鑿石。以梯行人。北溪之流經其下。灘瀨羸惡。怪石巉巖。有三磴二花之名。船楫不通。上下皆當逾嶺。溪傍有石狀如龍頭。因名。○九龍嶺在府南三十里。兩山夾峙。中築石磴。凡十餘里。路通潮州。嶺下有木

綿庵。宋鄭虎臣誅賈似道於此。舊志。府北三十里。又有九龍山。北有九龍水。金溪水。

海

府東南六十里。舊志。府去海二百里。今海澄縣東北即濱大海。與龍溪接壤也。志云。興泉之境皆兩面瀕海。惟府境與會城皆三面瀕海。故防禦最切。而澎湖嶼。寶漳泉二郡之外衛也。

九龍江

府東北四十里。一名北溪。亦曰龍溪。源出汀州府上杭連城二縣。及延平府沙縣界。東南流。合寧洋。龍巖。漳平之水而下。華峯。又會長泰諸水。過香洲渡。歷峽中。出峽為柳營江。與南溪會流。入海。梁大同間。有九龍遊戲江上。因名。縣曰龍溪。并以名

江也。又南溪在府城南。溪有二源。本曰雙溪。自南靖縣合流。東經員山之北。曰康仙渡。又東北繞郡城南。有三台洲。又東為方壺洲。水勢微折而南。復曲而抱城。東過文山。為西埔渡。又東會於北溪。或以為即古之蘭水。梁所取以名縣者。其上流或曰西溪。以

在郡城西也。亦曰南門溪。以繞城南門也。

柳營江

府東四十里。上有虎渡橋。志云。九龍江水自華峯而來。注九江山下。為漫潭。兩山如壁。流十餘里。漫而不湍。淵而不測。即梁時龍躍處。南流經香洲渡。又南經蓬萊峽。出兩峽間。巨虎渡橋。為東偏要害。丁氏古譜云。六朝以來。戍閩者屯兵於龍溪。阻

江爲界。插柳爲營。江當梅溪之交。兩山插峙。波濤激湧。西岸盡屬蠻獠。唐總章間。諸衛將軍陳政戍閩。征沒子元光代領其衆。陰遣人沿溪而北。就上溪緩處結筏連坡。從間道襲擊之。遂建寨柳江之西。以爲進取。恩威並濟。士黎歸附。因轄其地爲唐化里。柳營之名。自六朝時始也。宋紹熙間。郡守趙伯暹始作浮梁於下流。以度。嘉定七年。太守莊夏易以板橋。豐石爲址。醜爲十五道。而屋之名通濟橋。嘉熙元年。圯於火。太守李韶易梁以石而不屋。越四年。乃成長二百丈。址高十丈。醜水亦十五道。淳祐初。又燬於兵。明朝洪武三十年。復搆。正統。天順。成化。以後。屢經修建。舊志。唐末。王潮下泉福。嘗宿重兵以守之。故有柳營之號。元末。陳友定攻漳州。度柳營。江敗。漳人於馬岐山。遂下漳州。使人擊山道。城守自固。又陳讓記云。江南橋梁。虎渡第一。昔欲爲橋。有虎負子渡。江息於中流。探之。有石如阜。循其脈。沈石絕江。隱然若梁。乃因壘址爲橋。故名虎渡。卽柳營江橋也。又南與南溪合流。謂之福河。俗曰福澗。又東爲錦江。中有許茂。烏礁。紫泥。等洲。江流經此。分爲南北。南河至海澄縣界。北流歷白石。青礁石。美鎮。東與南流合。納浮官水入海。

天宮溪

府西北七十里。源出龍巖縣天宮山。流至此。爲漫潭之上流。亦曰天宮大瀨。中有石濤。高丈餘。其水傾瀉溪中。自成音節。俗謂之更鼓水。志云。府東化有菴溪。自連城縣來。經龍巖縣東北百里。入寧洋縣界。縈紆三百里。又南入境。流入九龍江。○西湖在城西。有泉甘美。可辟瘴癘。今埋一云。城東舊有東湖。周千餘畝。今亦廢。

蒲葵關

在府西南。一統志。關在龍溪縣二十一都。漢初。南越所置關也。或云。在漳浦縣西南七十里。唐時爲閩中嶺南之通道。○海口鎮在府東南。宋置以收海道商稅。又府西黃林保。有巡簡寨。宋置。亦曰龍溪龍巖漳浦。長泰四縣同巡簡寨。元廢。又縣南

有中柵寨。亦

宋置元廢。

高安砦

在府西北。元至元十八年。州人陳桂龍據此。乘高爲險。人莫敢進。元將高興以計焚其山。桂龍逃入畚洞。○石美堡在府東七十里。覆舟山下。嘉靖三十六年。建有土城。萬歷四十年。增修。又府東四十里有玉洲土城。府北十里有長橋土城。俱嘉靖

中土人築

以禦寇

福河堡

府東南四十五里。福河濱。嘉靖中。鄉人以福河係各港之要害。築土城以防倭寇。尋置官兵戍守。亦爲福河把截所。又福河上十里有鎮門土堡。在鎮門河濱。河卽南溪下流也。又東會九龍江。志云。鎮門港外通大海。內透城河。實爲郡城門戶。萬歷

末。築二小城。夾港南北對峙。設兵戍守。與福河堡及海澄縣相爲形援。○柳營江巡司在府東二十里。柳營江之西。洪武三年。設柳營江掣制所。隸福建都轉運鹽使司。十四年。改世驗鹽引所。正統九年。改爲巡司。縣東四十里。又有柳營江把截所。志云。縣北

百餘里有新嶺把

截所。以新嶺爲名。

丹霞驛

府治西。唐時城東有漳浦驛。後廢。宋淳祐中。建驛於城東朝天門外。元至正間。移府治東。明朝洪武三年。徙於此。九年。改清漳驛。尋復舊。舊有遞運所。後以驛兼領。又甘棠驛在府南五十里。接海澄縣界。元至正二十五年。置明朝因之。又江東馬驛

在府東四十里。宋爲通源驛。元至正二十二年。改今名。明朝仍舊。舊有遞運所。洪武二十三年。革。志云。府北二十五里。

有香州稅課局。元商稅務也。明初改爲稅課局。宣德中。省。正統十二年。復設。成化十年。圯於水。嘉靖四年。革。香一作鄉。

江東橋

在府東。卽虎渡橋也。江東驛置於此。又東四十里。卽泉州府同安縣之深青驛。爲往來襟要。詳見上柳營江。又薛公橋。在城南通津門外。宋紹熙中。始作浮橋。嘉定初。郡守薛揚祖累石爲址。七而梁之。長二十六丈。因名。橋西地下。潦至。田皆沮洳。五

年。郡守趙汝濤濬上流沙坂爲港。復建乾橋。一十七間於橋南。以殺水勢。又爲小橋。二十四間於乾橋南。接以石堤。二十二丈。直抵南岸。以便行人。其西南一帶。舊有土堤障水。紹興中。改築石堤。後橋堤不時崩圯。相繼增修。萬歷二十七年。大水爲害。郡守韓

攬議於東門外建文昌橋長九十八丈為梁二十八間尋圯三十年還修舊橋四十一年并修新橋俱為民利又流岡橋在府東十五里長百二十餘丈上有亭四百六十餘間亦跨南溪上

漳浦縣。府南百里西至南靖縣百三十里南至廣東潮州府三百十里西南至廣東程鄉縣二百十里本龍溪縣地唐垂拱二年析置漳浦縣為州治開元四年徙於今所乾元二年州治龍溪縣屬焉宋元因之今編戶五十二里

漳浦故城。

縣南八十里唐初置縣於此為漳州治在梁山之下地名雲霄其南漳水出焉因名漳浦開元四年州民俞其訥等以地多瘴請徙李澳川從之即今縣治舊志唐垂拱中陳元光開屯漳水北詔即屯所雲霄地為漳州治丁氏記謂州治

梁山西嶺盤陀之險一統志云今雲霄驛即故漳州治或曰驛在水南蓋與故城相對耳後遷今所唐末有城宋初僅立三門尋增為四淳祐三年始議築城禦寇未果元至正十二年創築石城濬濠環之明朝正德五年以後屢經修築嘉靖六年并濬城濠

嗣是亦相繼營葺今城周不及七里

綏安城。

縣西南百里晉義熙九年置縣屬義安郡宋因之齊嘗為義安郡治梁陳復舊隋開皇十二年并綏安入龍溪縣義安郡即潮州也懷恩廢縣在縣西南二百里唐垂拱二年置懷恩縣屬漳州開元二十二年廢為懷恩鎮又赤湖城在縣東四十

里元末李志甫作亂巨族曾仁禮率衆築城以禦之後圯正德中寇亂居民復修完之周六里有奇又西林城在縣南七十里元季有石城後圯正德五年修復

梁山。

縣西南三十里峯嶺盤結為郡之望其旁阜為大尖婆髻等山志云東南五里有峯山自梁山發脈而來挺然獨秀下臨鹿溪與隔溪拓港山對峙為邑水口一名鷺峯山其在縣東南十五里者曰瓦山高數百丈東峯距海西接南詔靖安及廣東大埔

縣地又東南三十五里曰鼓雷山斷岸千尺下瞰大江潮至怒濤急浪其聲如鼓如雷也又盡梁山之南境為碁山在縣西南百五十里又南為潮天馬山頗高聳餘見前名山

好景山。縣西北一里。縣治枕其麓。一名石虎山。以山巔有石如虎也。又西北二十里爲摩頂山。山高而圓潔。頂平坦爲縣境諸山之宗。又後到山在縣北十七里。蜿蜒秀峙。遠望如蛾眉。東有白鶴嶺。又東爲羅山。羣山羅列如拱揖然。支爲東羅巖。其北爲慈

恩嶺。盤折崔嵬。下瞰深谷。○海雲山在縣東二十里。壁立端重。上有沃田清泉。山半有海雲巖。其相接者曰馬鞍山。又竈山在縣東五十里。疊障高大。周環四十餘里。以中有仙人丹竈而名。怪石林立。山陽有田數十畝可耕。志云。縣東六十里有香山。山有五峯。如馬馳鳳翥。相峙者爲壘山。高數十仞。平坦如臺。近觀與諸山齊峙。海舟望之。則迥出羣山之上。又東有燈火山。距海里許。海行者或見山上有光如燈。因名。

大帽山。縣東北八十里。山大而峻。四面林木蒼鬱。頂有黃茅。形若戴帽。一名戴帽山。巖石泉壑。種種奇勝。北行爲海澄縣。東北行爲鎮海衛。皆此山發脈也。志云。大帽北麓爲磁竈山。產茶。山與大江相對。其東爲虎嶺。路通鎮海。山林深阻。舊多虎患。宏治中。患息。好事者改爲鱗山嶺。又東卽燈火山之西麓。○太武山在縣東北百里。一名大母山。山高千仞。周迴亘百餘里。屹立海上。端重聳峭。其南十里爲鎮海衛。東望大海。汪洋無際。陟其巔。漳泉二郡盡在目中。有小石城。相傳南粵王建德避漢兵。嘗保此。亦名建德城。似誤。又有延壽塔。高數仞。海中歸舶。望以爲標。

雲霄山。縣西南八十里。以高聳雲漢而名。舊志。山形端重。一作大臣山。亦名大神山。其據漳水北岸。與大臣相對者。曰將軍山。山形挺拔。如大將據幃幄中也。宋蔡如松云。古閩越王號力騶等爲吞漢將軍。使之南據險要以拒漢。因名。邑志云。唐成將陳元光征蠻時。據此。因名也。

盤陀嶺。縣南三十里。志云。在梁山西。路出潮州。漢蒲葵關路也。爲郡境之要隘。唐儀鳳中。成將陳元光開拓柳營江以西地。追竄寇於盤陀之下。盡殲之。永隆二年。元光移鎮漳浦。以拒潮賊。阻盤陀諸山爲塞。漸開西北諸山洞。拓地千里。因請置州是也。宋

曰葵岡嶺。又登雲嶺。在縣東。
北緬海衛城西南。俗曰大嶺。

魚腸嶼

縣東南三十里海中。相近爲竹嶼。居民數百家。歲獲魚鹽之利。又石城嶼。在縣東南四十餘里海中。亂石叢雜。望若城壁。傍曰菜嶼。生紫菜。又爲將軍嶼。亦以陳元光駐兵處而名。盤石疊疊。舟舶不通。濱海者多乘筏以取海蛇。又縣東五十餘里有

大桑。小桑嶼。地宜桑。居民皆染漁。在井尾

港內。港口又有大撒。小撒嶼。皆聚沙所成。

海

縣東南八十里。又縣東北距海百二十里。志云。縣境去海爲近。通潮大小港不一處。而斗米。井尾。虎頭等澳。則防禦要衝也。

漳江

縣南八十里。其上流曰西林溪。出平和縣界。南流過雲霄鎮城北。亦名雲霄溪。又南流而東。納梁山以南諸溪水。至鼓雷山南。銅山所北。入於海。志云。溪水自西林而出。海水自銅山海門而入。清濁合而成章。故曰漳水。又縣東五十里有黃如江。源出縣

北二十里龜山下。合諸小溪。過縣東五十里。會窰山水。又東出大坑佛潭橋。爲白石夾

港。由井尾澳入海。俗曰鴻儒江。近設鴻江營。以此名也。通典。黃如江在縣東南百里。

南溪

在縣城南。卽李澳川也。源出盤陀嶺。北流爲九曲溪。又東北有北溪。流合焉。其源引羅山白鶴嶺之水。合西湖東門溪。而會南溪。至城東南五里爲鹿溪。邑中諸水皆會焉。又東由陸鼈所虎頭澳而入海。志云。李澳川傍舊有李姓者居此。因名。引流灌田。

凡千餘頃。郡志。縣東北六十里有石埠江。流至太武山。斗米澳入海。○綏安溪。在縣南四十里。東流合李澳川入海。志云。縣有綏安等五溪。皆有灌溉之利。又縣西南有湧源溪。兩泉湧出。東北相對。一微煖。一極熱。合流而入縣前溪。縣前溪卽南溪矣。

西湖

縣西門外。宋嘉定八年開。周五百十五丈。後廢。萬歷三年復濬。又鑑湖。在縣東五十里。周二百里。水清如鑑。郡志。縣西二十里有蜡湖。本名淡溪。忽有蛇魚因名。郡國志。蜡湖之水。隨潮盈縮。今堙。

古雷鎮

縣東南鼓雷山下。古亦作鼓。有巡司。洪武二十年置。初屬南靖縣。正統六年改今屬。有城戍守。又後葛巡司。在縣東南五十里。亦洪武二十年建。有小城。縣南盤陀嶺下。又有盤陀巡司。正統六年置。以地接湖廣。山林深遠。為草寇出沒之衝也。亦

有城。○青山巡司在縣東四十里。又井尾巡司。在縣東百里。皆有城。與古雷司同時置。

雲霄鎮

在縣南。即潭浦故縣之地。元置雲霄驛。明朝因之。成化十年。為漳水所圯。尋復建。正德初。鄉民以寇亂築土城。旋燬。嘉靖五年。修砌以石。三十九年。為賊所陷。隆慶六年。增築完固。又設防海館於城內。以督捕通判駐此。為戍守要地。○埔尾堡在縣

南。去雲霄九里。初為土堡。後稍緣以山石。正德二年。山寇環攻。不能陷。嘉靖三十六年。倭寇力攻旬餘。竟敗去。因更增拓。砌以磚石。相近又有前塗堡。亦土堡。嘉靖三十七年。倭亂砌以石。志云。縣境有洋下等堡數十處。而縣東南之西山堡。則負山帶海。殊為險固。縣東五十餘里。有佛潭橋。砌石為之。雄傑雄壯。後漸廢。又縣東有井尾大徑。等把截所。東南有埠頭把截所。南有吳田。北岐港口。等把截所。

臨漳驛

縣治西北。馬驛也。宋置。曰仙雲驛。元曰臨漳。明朝因之。又雲霄驛。見上。雲霄鎮。○東溪橋在縣東門外。宋慶元四年建。元至正三年。累石重修。長三十丈。又五鳳橋。在縣南門外。宋淳祐中。累石為址。跨以石梁。長三十丈。又建乾橋。一百四十間。長二

百丈。明朝洪武四年重修。又鹿溪橋。在縣東南鹿溪上。舊名魚腹渡。宋慶元四年。累石為址。上跨石梁。醴水三十六道。長五十丈。後圯。洪武七年重建。

龍巖縣

府西北三百五十里。北至延平府沙縣三百五里。東北至延平府尤溪縣三百六十五里。西北至汀州府上杭縣一百五里。本晉新羅縣之舊。草鎮。唐開元二十四年。置龍巖縣。屬汀州。志云。是年置新羅縣於此。天寶初更名也。大歷十二年。改屬漳州。宋

元因之。今編戶二十四里。

趙公城

在縣治西。志云：縣初無城。唐時編竹爲限。尋築土牆。宋紹定三年，令趙姓夫於大對山巔築土城，可容千餘家，以避寇。謂之四岩。亦曰官寨。淳祐九年，令趙宗探瑩以石，俗號趙公城。元至元間，令黃士龍又卽巖麓築土城。縣治仍在城東。寇至輒毀。

至正十七年，築城包縣治，與舊城爲上下二城。二十一年，議以二城難守，乃聯築爲一，鑿濠環之。二十四年，以城西逼高山，不利守禦，因拓而大之，并闢城濠。明朝洪武八年修濬。正統中爲賊所燬。成化八年，因舊址修築，更闢西北隅。十四年，城始就。正德以後，不時營葺。今城周六里有奇。

北砦山

縣治後，縣主山也。一名後山。員聳如覆釜，亦名覆釜山。又治西爲大對山，故西砦在其上。一名官砦山。治南曰清高山，積石

石峯，石趾爲大小二洞，虛中如室，壁有雙龍紋。縣以此名。宋末，文天祥嘗駐師巖下。又虎嶺山在城西，西南二里，又有烏石山，其對峙者曰東山，皆環列郭下。

東寶山

縣東五里。志云：山麓舊產銀砂，因名。上有龍井洞，中爲翠屏山，亦曰翠屏峯。峯下卽龍巖也。左爲涼傘峯，三山連絡，亦曰三台山。腰有嶺，通漳平縣。又觀音座山在縣東三十里，當龍川水門，高數仞，勢極險阻。其東北曰傅溪山，圓秀同峙，如屏障然。

○鐵貓兒山在縣東北四十里，鐵石洋，特起圓阜，如貓內顧。龍川諸水經其下，爲縣之水口。山又高第山，在縣東百里，有高第諸地，高而危，層巒聳翠，其相近爲迷雲嶺，接漳平界。

紫金山

縣西十里。五峯秀削，壁立仞仞，朝旭含輝，夕陽倒影。土石皆紫若金，上有天然池，下有赤水巖，又赤巖山，在縣西四十里。以巖石皆赤而名，相近爲石鍾巖，奇勝不一。又雙髻山在縣西五十里，最高勝相近，又有九曲嶺。○奇邁山在縣南二十里，一

名九峯岐，嵯峨拱峙，森如列戟。又縣南六十里爲上方山，行旅所經也。其南二十里曰倒嶺，盤曲峻絕，嶺凹有文信國駐師故壘，嘉靖初於嶺上建樓雲亭，今爲防禦之所。

天宮山。縣北五十里。高聳深遠。上有瀑布泉。飛瀉數十丈。下流爲天宮溪。又九侯山。在縣北三十里。高入雲漢。廣袤數十里。九峯列峙。摩若公侯。因名。或僞爲九猴山。云形若猿猴也。一名筋山。志云。支麓盤據如筋絡然。又有壽山。在縣北四十里。高平方

正形如展軸。左畔峯巒錯列。舊名孝山。後改今名。○大陶嶺在縣北。盤踞數十里。與汀州沙縣接界。又東北爲均嶺。爲沙縣汀州兩分處。其水南北分流。南入九龍溪。北流入於尤溪。又有黃土嶺。與沙縣接界。以土色名。其水北流入延平志云。縣西北二百餘

里有茗林嶺。其水兩流。一入龍溪。一入長汀。趨廣東程鄉縣。

鴈石嶺。縣東北三十里。嶺北有鴈石渡。卽龍川所經也。地險仄。爲戍守處。又縣東二十里有罇林嶺。與鴈石相對。舊名罇林。後改今名。長林陰翳。歲暮多萑蒲之警。隸鴈石巡司巡守。○三峯嶺在縣東百里。嶺中有隘。

龍川。在縣城南。受汀州上杭及延平大田諸溪水。合大小池。歷龍門陸。至縣西。會羅溪。筋溪。諸水。環繞城南。至縣南三里。瀝爲石鼓潭。又東經觀音座山下。瀝爲窰口潭。潭形中廣而口狹。因名也。稍東南合俸溪水。循石峽而下。石峻水激。險怪萬狀。謂之傳軍

灘。舊不通舟楫。後闢成港。可引小舟。過鴈石渡而達漳平縣境。爲九龍江之上流。○羅橋溪在縣西二里。源出縣西南七十里。大小池。合流經此。上有羅橋。至縣南三里。石鼓潭而會龍川。又曹溪在縣西南五里。自汀州府永定縣來。至城南登高山下。會龍川。又有小溪。源出縣西南七十餘里之茶峒。清淺幽折。流經縣治。入於龍川。

鴈石關。縣東北鴈石山下。有巡司。正統十一年置。志云。縣北三十餘里有黃坑。水槽。東坑。蕭阮等隘。東北百里有三峯嶺。廂天山二隘。西五十里有九曲嶺。隘南有倒嶺。隘俱戍守處也。○大池。嘗在縣西南。又縣西有大池。巡司寨及虎頭嶺巡司寨。俱宋所

置。今故

址猶存。

適中驛

縣南六十五里上方山下。嘉靖十一年建。志云：縣城南有登龍驛，西有駐車驛，俱宋置。今廢。○龍門磴橋在縣四十里，道通上杭，又迎龍橋在縣西五里，兩山夾溪而下，橋跨其上，亦名龍門，與城南龍津橋東西對峙。道出汀湖，志云：迎龍橋舊名虎渡橋，以跨虎嶺山麓也。俗呼西橋，一名筋橋，與龍津橋俱跨龍溪上，長各數丈，歷代修圯不一。

長泰縣

府東三十七里，東至泉州府同安縣百二十里，北至泉州府安溪縣百六十里，西北至漳平縣二百二十里，本泉州南安縣地。唐乾符三年始置武德場，以便輸納，文德初改場曰武勝，又改曰武安。南唐保大元年升爲縣，改曰長泰，屬泉州。宋太平興國五年改今屬，縣故無城，周爲土牆。宋紹定間寇燬，端平中始築土城。元至正十七年增拓，明初砌以石，漸圯。正德十年列柵爲守，十三年復因故址營築。嘉靖三十五年增修，萬歷二年以後不時繕葺。今城周五里有奇，編戶十二里。

良岡山

縣西北五十里，縣之鎮山也。下爲良岡嶺，高危險峻，亘十餘里。志云：山上有龍鬚泉，湧流不竭，瀑布出焉。其脊大石層列，山麓逶迤而南，圓峯突起，縣治枕焉。曰羅侯山，又東瞰大溪，曰新寨山，舊設泰安寨。宋有寨官，因名山之西曰水晶山，山形如覆釜，營產水晶，與羅侯山俱峙城內。縣城蓋負山瀕溪也。○天柱山在縣東五十里，山最高，巖洞泉石種種絕勝，絕頂曰紫玉峯，環眺千里，如襟帶間。

吳田山

縣東北五十里，山雄峻，少樹木，高處有田十餘頃，流水成渠，可引以溉田，一名曷山。志云：縣北迤東四十里有鼓鳴山，高聳爲邑之望，下有洞，風吹則成鼓聲，因名。又縣東北八十里曰內方山，出銀鑛，萬歷二十七年中使奉命開採，商徒蝟集，奸宄乘機攘奪，防禦至切，羣禁不復採。○董奉山在縣北五十里，聳秀如卓筆，然相傳仙人董奉嘗遊此，相近有待詔山，亦聳秀而奇麗。

朝天嶺

縣東南三十里，高峻特起，旁接羣峯，舊爲入京之道，因名。有巡司，又桐嶺，在縣東北七十里，多林木，亦名白桐林，上有觀音殿，下有隘，接同安縣界。志云：縣東北又有磨鉛嶺，接安溪縣界，亦有隘。○黎壁嶺在縣西北六十餘里，崖壁斗絕，其相接者

曰大鷓鴣嶺。

以形似名。

龍津溪。

縣城東南。導源安溪界。流經縣東北。諸溪澗水。次第流瀆焉。分合回環。至雙溪口。入龍溪縣。至華峯嶺下。而合九龍江。或謂之長泰溪。○馬洋溪。在縣東北四十里。源有二。出山谷間。灘途險惡。合流入龍溪縣界。又有高層溪。源亦出安溪界。經縣西。

北大鷓鴣嶺下。有灘。亦入。

龍溪縣。俱注於九龍江。

朝天鎮。

在縣東南。朝天嶺下。亦曰朝天嶺。巡司。正統五年設。嶺巖險多盜賊。萬歷十八年。移於縣東北六十餘里之溪口。亦曰溪口。巡司。察白桐。磨鎗等隘。出入非常。志云。縣有巡簡坪。在磨鎗嶺上。舊設巡司。因名。又朝天驛。舊在縣治東北。今廢。○石高寨。

在縣東十里。宋置。昔人營保。此以避賊。又縣。

東南三十餘里。有天成寨。縣城東有泰安寨。

林口隘。

縣北五十里。又縣西北有鷓鴣。下翁等隘。縣東北有上寧。磨鎗。白桐等隘。縣東南為朝天嶺。隘。俱有民兵戍守。○西安橋。在縣城西。萬歷二年建。長四十餘丈。又城東有東津橋。東南里許。有朝京橋。皆長數十丈。跨龍津溪上。宋置。今廢。為渡。志云。縣。

西南一里有南洋。

橋。亦宋置。今廢。

南靖縣。

府西四十里。西至龍巖縣三百二十里。南至廣東程鄉縣百五十里。北至漳平縣二百二十里。本漳浦。龍溪。龍巖三縣地。元至治中。以地險遠。難於控禦。割置南靖縣。至正十六年。改今名。今編戶十七里。

南勝城。

志云。舊址有二。初置於縣西南九圍嶺山之東。元順帝至元三年。畚寇李勝等作亂。事平。乃徙治於小溪瑄山之陽。至正中。又徙雙溪。改名南靖。始築土城。西南顏溪。東北濬濠。為固。明初。因之。正統十七年。為鄧寇所陷。嘉靖六年。葺以石。二十八年。

增修四十年。又爲賊所陷。明年復陷於賊。四十四年。改築城於大帽山麓。南去舊城里許。萬歷二十二年。以新城耗敝。復營舊城。仍徙治焉。城周三里有奇。

歐寮山

縣北一里。一名大帽山。又名三鳳山。志云。山後有五峯峙立。端巖峭拔。周百餘里。又縣西北五里有寶珠山。其並峙者。左曰鏡山。右曰磨石山。寶珠夾兩山間。形圓如珠。下有溪流迴繞。縣西二十五里。又有紫荊山。五峯聳翠。中有龍潭。○胡山在縣前。雙溪之南。山下有湖。又有鼓旗山。縣治南。案山也。內山圓如鼓。外山展如旗。俗呼拔旗山。

峽口山

縣東十五里。兩山相夾如門。雙溪出其中。又閩山。在縣東南十五里。崇圓峻拔。左郡右邑。爲接壤處。又東南曰西天山。一名獅山。列嶂如翠屏。爲郡之西辰。又東即三平山。志云。縣南五十里有天馬山。一名鷓鴣山。皆以形似名。相近爲橄欖湖。山形尖而厚。形如橄欖。下有湖。連峙者曰林壁山。出水晶。一名榜眼尖。以明初李貞居其下也。又虎頭山。在縣南九十里。崎溪上。形如虎頭。

浮山

縣北八十里。接龍巖縣界。山當往來之路。與上下山不相連屬。如浮空然。亦曰浮邱。又南十里有金山。山下侈上銳。形若金字。中有峯突起。俗呼鷓鴣山。○朝天嶺在縣西北百餘里。山最高聳。四時雲霧接天。當漳平。龍巖兩縣界。又峯蒼嶺。在縣東北十六里。峯高入雲。四時蒼翠。峯蒼澗出其下。南流入雙溪。

雙溪

縣治前。一曰大溪。出縣西南。平和縣界。入縣境。與諸溪合。至縣前。一曰小溪。出西北龍巖縣界。經縣北。亦與諸溪合流。至縣前。合大溪。東流出峽口。入龍溪縣界。卽南溪上源也。○深渡溪在縣西北五十里。自龍巖縣界歷龜洋入小溪。又三關溪。在縣西南百三十里。源出汀州府上杭縣境。歷山城水寨。至西場寨而入大溪。

海子潭。縣西三里。深渡湧口。二溪匯流於此。磨石。寶珠。兩峯對峙如壁。潭瀦其間。淵深不測。引流東出。水口若門。志云。湧口溪自縣北金山南流。經海子潭。

古雷鎮。

在縣西。元爲古雷巡司。今廢。志云。縣南有小溪巡司。元設。洪武二十年。江夏侯周德興移建於漳浦縣古雷山。以備倭寇。正統五年。小溪草寇竊發。復設於此。今爲平和縣界。又九龍鎮巡司。在縣南百餘里。正統五年建。亦曰九龍寨。志云。龍溪之海

門。漳浦之鹿尾。南靖之九龍。皆爲海防險要。○和溪巡司。在縣北百七十里。接龍巖縣界。又永豐巡司。在縣北百九十里。地名韓婆徑。正統五年。與和溪同置巡司。景泰二年。改今名。以在水豐里也。宏治中。兼設韓婆徑隘。爲戍守處。又縣西有水尾寨隘。亦宏

治中置。又平南驛。在縣北百七十餘里。

成化六年。設有平南橋。爲往來津要。

漳平縣。

府西北三百里。東至泉州府安溪縣二百四十里。西至龍巖縣一百二十里。北至延平府永安縣一百二十里。東北至延平府尤溪縣二百九十里。本龍巖縣地。成化三年。縣民林廷瓊等。以地險遠。賦稅不供。請別置縣。從之。七年。置今縣。治九龍溪北。縣

居漳上流。千山中。地稍平衍。因曰漳平。初無城。宏治四年。立木柵以禦寇。正德九年。始以磚石鑿築。嘉靖以後。相繼增修。城周三里有奇。編戶二十四里。

龍亭山。

治西一里。山半清泉一脈。可以溉田。頂容二百餘人。鄉人嘗置寨以避寇。亦曰龍亭寨山。登其巔。則衆山皆在目中。最爲高曠。又西北曰古濠山。山勢雄峻。縣西諸山之宗也。○仙帽山。在縣西北十里。一名西霧山。連接羣峯。逶迤盤結。而此山特巍

峩秀麗。相傳鄉人嘗避寇於此。寇將迫。忽雲霧四合。寇迷不能進。因名。又北曰九仙山。九峯疊巒。雄敞峻絕。山後朱仙洞。石室幽邃。六月生寒。一名九星山。縣北二十里。又有石鼓山。與仙帽並登。俱爲縣北之屏障。志云。淡雲山亦在縣北二十里。峭特而秀。山

半地勢平夷。土人居之。又北爲賴家山。高聳而頂平。民居其上。

三尖山

縣南三十里。崇峯巒峙。林木蒼翠。縣界四十里。曰覆鼎山。林木深邃。多產寶物。山頂特出。如覆鼎然。又南數十里。曰大壯山。宏壯爲羣山冠。○銀瓶山在縣東十里。層峯疊翠。其狀如瓶。又北有小都山。山高泉冷。上有巖。盛夏可以避暑。相近者曰鉛

山。舊產鉛。閩人多採爲利。旁有數峯相接。又石門隔山。在縣東二十里。兩山夾峙。其狀如門。又東十餘里爲雲峯山。雄峻屹立。常有雲氣浮其上。中有寶臺巖。

碧靈山

縣西北五十里。亦曰碧凌山。黛色蒼蒼。高凌霄漢。上有寨場。下有巖。又西曰天柱山。雄峙高聳。與龍巖縣接界。自山而西北曰巖頭山。舊產銅。民採以爲利。志云。縣東北有雙髻山。一名螺髻。與尤溪縣接境。

象湖山

縣東南六十里。接平和縣界。山深地僻。爲嘯聚之藪。正德中。象湖賊作亂。南贛撫臣王守仁討平之。志云。近山有湖。泉混泥深。視若田然。僅半畝許。蓋藪澤所鍾也。相傳曾有象過此。陷不能起。因名。

三重嶺

縣南二十里。上有三峯疊出。高下相因。崇峻險僻。人迹罕到。又朝天嶺。在縣東北。最高峻。有徑道達延平。使者按部。亦時經此。○百家畚洞在縣南五十里。界龍溪。安溪。南靖。龍巖。漳平。五縣間。縣正當其北。爲要衝。萬山環抱。四面阻塞。洞口陡隘。僅

道人行。中寬廣容百家。畚田播種。足以自給。四方亡命者逋聚。其間。憑村爲亂。宣德正統間。烏合跳梁。官兵勦捕。數載始平。

九龍溪

縣治南。自龍巖縣。鴈石嶺東流。亦曰鴈雲溪。又東歷縣境。縈繞縣南。匯諸川水。爲深潭大湍。亦曰漳平上溪。下流入龍溪縣界。經華峯嶺。水石峻險。凡十餘里。東南流爲柳營江之上游。又九房溪。在縣西北。源出汀州府連城縣。流經寧洋縣境。合徐

溪。又有羅溪。源出永安縣。流入境。徐溪來合焉。又南會九龍溪。○溪南溪在縣東北。源出安溪縣界。流入境。歷縣東華口。又有下折溪。在縣南三十里。亦流至華口。俱會於九龍溪。

三清湖

縣北十餘里。地名魚龍津。自高山發源。湧爲石湖。瀑布而下。疊聯三潭。因名。志云。湖與九仙山相近。又有白鶴湖。在縣南三十里。山巔峻絕。湧泉成湖。瀑布而下。爲第二宮。第三宮。一名三溪林。又盪池。在縣北寧洋縣界。周二十餘里。不溢不涸。有澗

田之利。

歸化鎮。

縣南三十里。有巡司。又溪南巡司。在縣東二十里。俱明初置。○桃源店在縣北三十里。寧洋縣界。元曰聚賢和睦等處巡司。屬龍巖縣。明初因之。尋徙而南。以村為名。洪武十四年寇燬。十八年重置司署。二十年江夏侯周德興以地非衝要。遷於漳

浦縣金石寨。二十五年復

遷故址。成化中改今屬。

三峯隘。

縣北十餘里。又北有華口。安井。赤坑口。等隘。又禾頭隘。在縣北二十餘里。其相近者有白泉隘。又長塔隘。在縣東北二十五里。又東有卓安。石門。隔南坑村。石錐嶺等隘。又縣南三十餘里有朝天嶺。下馬坑。香樹嶺等隘。

平和縣。

府西南二百五里。西南至廣東饒平縣百里。北至汀州府永定縣二百五十里。東北至南靖縣七十里。木漳浦。南靖。二縣地。正德十四年。南贛撫臣王守仁討平象湖賊。上言河頭之地。北與蘆溪流恩山岡接壤。西北與漳平象湖山接壤。而平和等鄉。又

與廣東饒平縣大徽。箭灌等鄉接壤。皆窮險賊巢。與所屬縣治相距五日程。往往相誘出劫。宜

設縣控制。於是析置今縣。并築縣城。萬曆三年以後。屢經修治。城周三里有奇。編戶十二里。

長盧山。

縣北十里。縣之主山也。其近城北者曰卓鳳山。形如飛鳳。城東曰東山。西數里曰樓宅山。以形如樓閣也。樓宅之東曰岑山。與東山遙對。迤南曰天馬山。如天馬馳驟。雙峯矗起。為縣治案山。○象湖山在縣西北。接漳平縣界。郡志云。在岑山之西。又

五牙山。在縣西南。九峯聳立。如牙。葱然。產礬石。一名礬山。南勝縣初置於此。又瑄

山。在縣東。南移南勝縣於瑄山之陽。即此瑄。亦作官。今山麓居人甚盛。稱為樂土。

三平山。

在縣東南。巖谷深邃。結曲崎危。登者必歷三險。三平。乃至其巔。有峯巖泉石諸勝。又大峯山。亦在縣東南。縣之鎮山也。一名大峯崎山。高峻巖巖。石峯凡十有七。白山麓至巔。可五十餘里。登陟一望。遠近城邑。悉在目前。商舶渡海。以此山為表。山多

峯巖洞壑最勝者爲山北之靈通巖。志云。漳浦詔安海澄鎮海衛諸山脈皆發於此。

蘆溪山

在縣西北。山勢雄壯。又北爲流恩山。正德中。王守仁撫南贛。敗信豐。龍南等賊。賊走象湖山。擊敗之。賊復入流恩山岡等巢。尋遷去。守仁又攻何塘洞山砦。及長富村等處。二十餘巢。皆平之。信豐等皆江西贛州府屬縣。

河頭溪

在縣治東南。源出大峯山。志云。大峯山泉潰四注。盡地成川。自正西出者。其下爲蘆溪。西經縣治。曰河頭溪。清澗可掬。西流至廣東大埔縣三河壩。合蘆溪出赤水巖。下潮陽入海。志云。蘆溪出蘆溪山南。流至三河壩合頭溪。

高山溪

縣東北。亦出大峯山。曰高山水。歷大小坪。合翠溪。之水爲溪口溪。流入南靖縣。會爲大溪。土人呼爲高坑石神溪。或以爲卽石厓溪也。舊志。溪源發江西閩廣之交。下流入海。水最惡飲之則病瘴。徒涉者則足黑。謂之烏脚溪。昔時自閩入粵。皆載水

自隨。以是水有毒也。通典云。石厓溪在漳浦西北百五十里。今溪在大峯山東。或水性變異。而舊蹟尙存云。○河上溪在縣東南。亦出大峯山。或云。大峯之支麓有旗山。水源出焉。流爲西林溪。又南爲雲霄溪。卽漳浦縣漳江之上源也。縣南又有徐坑溪。南流

爲合溪。亦名雙溪。又東南經葛布嶺。有魚鼓溪。馬溪。流入焉。下流爲詔安縣之東溪。

蘆溪鎮

在縣北。漳汀巡司置於此。志云。縣境大峯山南有龍峯頭堡。又東有溪口堡。路當平和南靖漳浦之交。居民輻輳。嘉靖間。寇亂。居民累土爲城。因溪爲池。寇不敢犯。又東北二里許有西山堡。亦嘉靖間土人築以禦寇處。○高礮隘在縣東北。又有朱

公畬。曹充。赤珠。三萊洲。茶寮等隘。縣南又有半地。三角。窄隘。

詔安縣

府南二百里。東北至漳浦縣百三十里。西至廣東饒平縣百七十里。本漳浦縣南詔地。宋爲南詔場。元至正中。右丞羅良命屯官陳君用砌石爲城。以防不虞。明朝安治中。廣寇爲患。調漳州衛官軍戍守。正德十四年。設捕盜通判駐焉。督平和饒平二縣。

尋廢。嘉靖九年析置
今縣編戶二十二里。

南詔城

即今縣治。宋南詔場也。後爲沿邊巡檢寨。亦曰臨海營。元至正十四年汀漳盜起。因築城爲備。東臨溪。西南北倚山。城周三里有奇。明初爲南詔把截所。正統十四年鄧寇猖獗。漳寇乘之。攻圍八月不能陷。宏治十七年廣寇突入城中。四出劫掠。乃議調漳州衛後所官軍置南詔守禦千戶所。始拓城西偏而廣之。砌以石。周七里。有奇。嘉靖九年設縣。遂爲縣城。自是屢經修築。三十七年增築城垣。濬河四周。半通海潮。四十二年仍築外城。周六里有奇。又築西關城。周三百餘丈。稱爲完固。

良峯山

縣西一里。聳拔奇秀。縣之主山也。縣東北十五里曰九上落山。其山九上九下。舊爲通道所經。剽掠者往往伏匿在崖谷間。嘉靖二十四年道移而東。寇患始少。○赤坑山在縣西三十餘里。攢聚若五星。又點燈山在縣北三十里。夜常有騰光。

名。因

九侯山

縣北二十五里。九峯並列。有石門可通車馬。中多泉石之勝。其相接者曰烏山。峯頭巨石嵯峨。半插天表。北接雲霄鎮。東聯樓仔林山。爲邑後障。一名火燄山。以山形尖聳也。又厚廣山在縣東北二十里。一名和廣山。峯嶺聳秀。與初稽九侯諸山形勝聯絡。志云。初稽山在縣北二十五里。○金溪山在縣西北四十里。俗曰金鷄山。與六峒諸山相接。舊有銀坑。正德初議開採。不果。萬歷中復議開。商賈雜選。姦究欲乘機爲變。尋奉旨封閉。又以南詔所官兵更番戍守。然盜鑛者隱匿猶故也。又龜山在縣西南二十五里。上有巨壑。蛟龍潛焉。又有石洞。山之右有漳潮分界巡司。又大南山在縣南十五里。兩峯銳秀。俗名大尖。小尖。自山而西。綿亘數十里。若巨扉森立。接於龜山。

樓仔林山

縣東北五十里。山勢聳嶺。崖石林立。有石屋數十處。可容百人。稱十八洞。嘉靖末。附山劇寇嘯聚谷中。出沒靡常。大爲民害。久之稍息。然叢林峭險。姦慝恆伏匿焉。志云。山勢與九侯諸山連絡。爲邑之鎮山。自梁山踰盤陀嶺而南。此山羣

峯插天。居然競勝。支麓爲葵岡山。在縣東四十五里。綿亘數里。中有兩小山相峙。稱相見嶺。有古關隘。累石而成。宋爲沿海道。巡海所。近以上湖後港。諸村豪黠。劫掠浙兵守之。縣東六十里。又有餘甘嶺山。盤亘曠邈。爲漳浦。詔安接壤處。舊時路出山嶺。崎嶇不便。萬歷二十五年。縣令

夏宏改田山腰。甚爲民便。

漸山

縣東五十里。高峭千仞。頂分二峯。中有潭。深不可測。甚相望者爲雙岐山。以兩峯相岐而名。志云。山在縣東三十五里。與厚廣山相連。又元鍾山在縣東南三十里。距元鍾所十里。濱海。漳舶出洋。舊皆發於此。原設公館。上簿鎮焉。後設縣。鎮廢。以其地屢

爲倭寇所憑。發船移於海澄。志云。元鍾之北。又有梅嶺。爲戍守處。嘉靖四十四年。戚繼光敗賊吳平於此。○大帽山在縣東。負海最奇。聳宋末丞相陸秀夫陳宜中。扶帝昺泊舟於此。又川陵山。亦在海濱。半入海。俗傳帝昺南渡。將都南澳。築此爲東京地。遂陷爲海。今城堞尙存。自山巔向海。莫窮其際。其峯青巒秀麗。號爲蘇尖。一名倉陵。亦號東山。北去銅山所十里。相接者爲虎岡山。又有揭榜山。亦曰東湖山。山下有小湖也。又甘山。在海中。遠望山巔。若小髻然。天將颶風驟雨。則形狀變幻不一。中有井水。獨甘淡。因名。又虎仔嶼。南村嶼。崎嶇犬眠嶼。皆在川陵山南大海中。

海

在縣東南。海防考。縣咫尺卽海。控引潮粵。最爲險要。而元鍾所之勝澳。則縣之門戶也。由海口西出半日程。爲饒平之南澳山。砥柱海中。周圍二百餘里。與元鍾所對峙。其山之遠者曰黃芒山。長三十里。遭逃之民居焉。伏險竊發。爲信地要害。又有蠟嶼山。長二十里。相近爲洋嶼。中多平田。漳潮民雜處。耕佃樵牧於此。遞南入潮之澄海。潮陽縣界。郡志。詔安之海有三派。一由銅山所之。大京門入。縣東百浦。走馬溪止。一由元鍾所北港門入。經漸山。滙梅洲上湖止。一由元鍾所南港入。經赤石灣。繞縣治至甲洲止。其從南澳入者。則潮之黃岡廣之南海矣。

東溪

在縣城東源出平和縣大峯山入縣境回環流諸溪澗水悉滙入焉經縣南五里爲橫嶺渡又南入於海○港頭溪在縣西瀝諸溪水出龜山西象頭渡入海又大陂溪在縣東十四里由西北馬洋山東南流至大陂南繞梅州村復抵漸山而入海又走

馬溪在縣東南內有東澳爲海口藏風之處寇船往來嘗泊此俗呼爲賊澳距元鍾所二十里嘉靖三十九年倭賊自廣東突入走馬溪勢甚張官軍與戰沉其數艘賊敗遁官兵追至廣東南澳大洋而還

金石鎮

在縣東南海中元設在今寧洋縣境明朝洪武二十年徙置於此有城又洪淡巡司亦在縣南海中地名北埔元置於縣東五十里之汚州明朝洪武二十年移今所又東沉赤山巡司在縣西二十五里元置在今南靖縣境洪武二十年移於縣南

海中正德十五年徙此改曰漳潮分界巡司俱有小城戍守○峯頭嶺在縣東又縣東四十餘里有梅洲土城志云縣東有甲洲土城嘉靖二十五年築相近有上湖土城嘉靖二十四年築皆爲戍守處

白葉堡

縣西百餘里有白葉洞賊巢也嘉靖中羣賊嘯聚於此出沒潮廣間二十七年官軍四面會討平之因置今堡有白葉洞水下流入東溪志云縣西二十里有分水關又二十里卽廣東饒平縣之黃岡驛又有老虎關及牛砂嶺關牛掌等隘俱接饒

平縣境縣北又有龍

過關接平和縣境

南詔驛

在縣城內宋爲臨水驛在北關外洪武初重建改今名○東溪橋在縣東門外長七十丈嘉靖二十八年創建木橋隆慶五年重修改曰通濟橋萬歷二十四年易以石仍曰東溪橋又有洋尾橋在縣東五里亦曰廣南橋初設渡船萬歷七年創建

石橋凡百有餘丈又平寨橋在縣南五里亦萬歷間改渡爲橋又安濟橋在縣西十里嘉靖十六年建長各二十餘丈志云縣南有陳平渡在海中設把截所於此

海澄縣

府東南五十里東至泉州府同安縣百四十里本龍溪縣濱海地正德間土民以番市起寇嘉靖二十七年始議設縣不果三十年建靖海館於此三十五年爲海寇焚掠因築土堡爲防禦計未幾倭入寇姦民乘機盤踞撫臣譚倫招撫之更設海防屯

駐於此。四十三年。巨寇伏誅。明年。議割龍溪并漳浦地置縣。事聞。賜名海澄。隆慶初。始設縣治。五年。改營縣城。明年。訖功。周三里有奇。編戶四十三里。

儒山。

縣西南二里。縣之主山也。圓秀突起。俗呼蔡前山。又席帽山。在縣南七里。高聳圓秀。狀如冠帽。其西爲常春山。秀貌峯巒。拱揖。縣治其東爲鴻江山。又東北爲鹿石山。雄峭壁立。爲縣東屏障。○虎甲山在縣西一里。俗名美山。巖巖盤踞。又西曰龍頭山。兩山之間。有一峯突出。盤回昂聳。狀如獅子。曰陳坑山。又西南曰石壁山。最高峻。上有巖。

大鼇山。

縣西南十里。蜿蜒魏哉。特聳二峯。形若筆架。又南岐鋪頭山。在縣西南十五里。南漢之水。自標潯而下。大海之水。自浮宮而入。至此會合。倒流紆延。而分繞於邑內。亦名倒港山。○漸山在縣西。聳起高峯。雄大尖秀。雞籠南岐。諸山擁峙。水口山下人

民輻輳。

雲蓋山。

在縣東南。有石室。容數百人。巖嶺巉峻。雲氣嘗覆其頂。又龍門嶺。在縣東。上有石高十餘丈。宋末。文天祥奉少帝南奔。道經此。題跡猶存。又雲嶽嶺。在縣東。與向安縣接界。○圭嶼在縣東海口中央。狀如龜浮水面。俗呼龜嶼。亦曰雞嶼。隆慶六年。議

移海門。濠門二巡司。築城其上。以壯形勝。城成復廢。今爲戍守要地。又高嶼。在縣東。又有長嶼。皆三面臨海。居民各數百家。志云。宋末。少帝浮舟海上。遇誕辰。羣臣構行殿。嵩呼行禮。故嶼以嵩名。今遺址猶存。縣東北又有活嶼。在同安界海中。林木蒼翠。官軍備倭者。置水砦於此。後遷砦於嘉禾嶼。此地遂爲盜藪。詳見同安縣志。又胡使二嶼。在海門上下。延袤數里。先是居民憑海爲非。正統初。移其民而虛其地。郡志。胡嶼故名。荆嶼。上多荆木。使嶼故名。梁嶼。今故爲海門。南北山海中。又有丹霞嶼。亦曰赤嶼。

海。

在縣東北。自縣以西北。諸水悉由此入海。曰港口江。亦曰港口大溪。潮汐吞吐。黏天浴日。浩然大觀也。一名圭海。蓋以圭嶼而名。聞見錄。港口有大泥諸險。又自主嶼以西。有紫泥洲。西接烏礁。許茂諸洲。又西北數里。卽柳營江合諸溪處也。謂之三汊河口。

之地。謂之澳頭。卽福河北岸。自郡東抵省會之通道。海舟登泊最易。防禦爲切。由海門東出水程二日。卽澎湖島。漳之汛守歲凡再至云。

月港。

在縣城西南。接南溪東北通海潮。其形如月。志云。正德中。土民私出月港。航海貿易。諸番遂爲亂。皆嘉靖九年。於縣東北十餘里。海滄澳置安邊館。委通判一員駐守。二十七年。議設縣治於月港。尋增建靖海館。以通判往來巡緝。旣而倭賊入犯。仍據月港爲巢。於是築土堡。跨溪爲橋。築垣其上。未幾復爲寇據。隆慶五年。濱月港爲縣城。而安邊館仍爲守禦處。又普賢港。在縣西。志云。上通九十九坑之水。達於海。○南溪在縣西南六里。源出平和縣三平山。經馬口。受漸水。擲潯。諸水下流至浮宮。入於海。此縣境之南溪也。

海門鎮。

縣東十餘里。有巡司。舊置海門社於縣東北海門山。正統六年。以地險民悍。時爲寇患。設巡司控禦之。七年。徙其民於內地。并移巡司於青浦社。卽此。又濠門巡司。在縣東嵩嶼上。洪武初。設於海滄洋。二十一年移於此。又島尾巡司。在縣東南明初置。本屬漳浦縣。後改今屬。○九都堡在縣城西。今學宮餉館設於此。志云。隆慶初設縣。分八九都爲二。堡八都堡卽今縣治也。時又於八都堡南築草坂堡。四年改營縣城。草坂堡并入城內。而九都堡仍舊。

港口堡。

在縣北。又有珠浦。廣林。虎渡等堡。在縣西南。相近又有嶼上。田尾。二堡。縣東北又有長嶼。何山。石困等堡。○石馬鎮在縣北十五里。北達郡城之津。要有兵戍守。又西五里。卽龍溪縣之福河堡。又安邊館在縣東北海濱。嘉靖九年置。四十三年寇吳平。巢於此。都督戚繼光討逐之。殲其餘黨。今有兵戍守。

寧洋縣。

府北四百里。東至延平府大田縣百八十里。北至延平府永安縣百四十里。西北至汀州府連城縣二百五十里。南至漳平縣百二十里。西南至龍巖縣二百里。志云。龍巖縣東北境有東西洋。界於漳平。永安。大田。連城四縣之間。溪洞深邃。島道險峻。經

二百餘年，鞠爲寇穴。至正統間，亂無寧歲。乃置巡司控制之。其地四山環列，中寬平。嘉靖四十一年，饒寇掠境，山賊廖選等聚衆爲亂，官兵不能制。四十四年，賊平。隆慶元年，置縣，以巡司爲縣治，割龍巖及大田、永安地益之，名曰寧洋。并築城，鑿以磚石。萬歷以後，屢經修葺，城周不及二里，編戶十一里。

金鳳山

縣治北，縣之鎮山也。圓峯突起，麓有平陽，結爲縣治。又北有王岡山，自百種畚分爲嶺兜，具當諸山，由穿石隔，赤洋埔，達於城北。又縣西北五十里爲馬家山，亦曰馬峯山，頂尖秀，爲衆山之望。志云：自馬家山逶迤而南，由駱駝崎，歷蓋竹溪，百種畚，過鼓樓隔，至謝田崎，轉折而東，結爲金鳳山。又天頂山，在縣北，其山極高，頂平坦，可容萬人。上有古井，志云：縣東北二十五里有虎山，縣西北三十里有百刻嶺，俱北出延平府永安縣之道。

香寮山

在縣南，上有紫雲洞，可容數萬人。正統中，鄂茂七據此爲亂，官軍討平之。山之絕頂有天臺，臺有龍潭，石窟如釜。又賴家山，在縣東，上有虎符巖，最高勝。自山而西，由廢坑石兜，轉至縣南，爲麒麟山。又城南三里有天柱山，以圓峻得名。○殺狐嶺，在縣西北，鳥道險峻，人迹稀少，嘗爲寇巢。名龍頭寨，嘉靖四十四年，官兵會討山寇曾東田等，於此數月不克，忽有大狐自嶺上坑飛下，官軍殺之，三日而賊滅，因以殺狐爲名。

東西洋

在縣城東南，有三源，自縣東北諸山，谿南流者曰南溪，自縣北流會南溪者曰北溪，自縣西北合諸山，溪水流會南北二溪者曰西溪。三流合而繞縣郭，激盪生濤，湍瀨迅險，謂之東西洋。亦曰前後洋。正統中，鄂茂七等嘯聚於此，南流經漳平縣境，爲九龍江之上源。又徐溪，在縣西四里，志云：出縣西郭家山，又有大坑溪、小溪，俱流合焉。南入漳平縣境，合九龍江。

坑源隘

縣北四十里，又北二十里，至延平府永安縣之林田隘。林田北出之要會也。○寧濟橋，在縣城南，萬歷五年建，長十八丈，尋圯，九年重建。

附見

漳州衛

府治西。洪武三年建。屬所二。曰守禦龍巖中。中千戶所。在龍巖縣治西北。成化七年。調漳州衛中所。鎮海衛後所。官軍守禦。隸漳州衛。又南詔守禦千戶所。在詔安縣治東。宏治十七年。寇入南詔城。劫掠。明年。調漳州衛後所。官軍守禦。改屬漳

州衛。

鎮海衛

在漳浦縣東北九十五里。本名岐島。有城嶼。洪武二十年置衛。并築城以備倭。城周四里有奇。領所三。志云。衛城東南十餘里。有東鎮嶼。南鎮嶼。西南數里有鴻儒嶼。南鎮嶼。西曰連進嶼。一名大嶼。衛東南又有將軍礁。一名雞心淵。水底石骨內接

鳥鼻頭山。外連東鎮嶼。里許。長則沒。退則見。亦名浮沉洲。又有半洋洲。東接龜嶺。西接南鎮。晴明時見白浪。長百丈。名白玉礁。龜嶺在衛城東南。如神龜出海。因名也。島嶼綿亘海濱。爲衛城拱衛。

守禦六鼇千戶所

在漳浦縣東南。志云。縣東月窰山。南有餓窰坑。南行三十餘里。平沙漠漠。三面皆海。惟正北可以陸行。所城憑焉。如巨鼇戴山。舊名青山。亦曰鼇山。山腰居民鱗次相疊。初置青山巡司。洪武二十年建所。築城周二里。有奇。城北曰大澳山。一名羅崎山。土色純赤。東爲對面山。又東北爲虎頭山。與古雷山對峙。商船魚舟皆經此。

城東南又有鳥嘴。雞心等山。又有橫嶼。在海中。長亘里許。又有雙洲。俗名洲門。自廣入海。船艦必經之道也。

守禦銅山千戶所

在詔安縣東。其地舊名東山。爲民間牧藪。洪武二十年置所。築城周三里有奇。嘉靖三十六年。增修以禦倭。三面環海爲濠。惟西面行二十里。始踰陳平渡。本屬漳浦縣。嘉靖十三年。始改今屬。志云。所舊置於井尾澳。

景泰間。始移於西門澳。北自金石以接浯嶼。南自梅嶺以達廣東。皆屬哨守。有西門澳水寨。五水寨之一也。城中有山。曰古樓。南對川陵山。山右爲白沙山。又城西爲瞭望山。又西爲東嶺山。西二里曰水寨大山。其在海中曰烏石平山。列屏如黛。周圍數里。又

有大小甘山。以嶼名者。曰東門嶼。流浪衝激。俗呼大驚門。下有沙島。積石疊起者。爲鐵江嶼。五墩聚立者。曰五嶼。川陵山東。曰雞心嶼。沙灣環帶曰南嶼。水寨旁爲後澳港。海舟避風處也。其相近者。又有井仔灣。蟹殼澳及沙洲諸處。

守禦元鍾千戶所。

在詔安縣南。東北接銅山所。西南抵潮州界。自澳口至南澳。約三十餘里。洪武二十年置所。築城周三里有奇。嘉靖四十二年。爲倭所陷。隆慶六年重修。城內有果老山。四面八山。連環相向。一名古老山。城東有東山。

海中有內嶼。外嶼。又有蛤洲。獺洲。敏洲。紅洲。臥岡洲。陳洲。澳上爲南山墩。城外市曰卸石灣市。漁舟鱗附。居民貿易甚盛也。海防考。鎮海衛及所屬三所。皆列海濱。賊自粵趨閩。則南澳。雲蓋寺。走馬溪。乃其始發之地。哨守最切者。銅山。元鍾。二水寨而已。銅山有把總駐守。而元鍾隸焉。故止稱一水營。嘉靖中。最爲賊衝。

附考

琉球。

琉球之地。在泉州府東海島中。亦在福州府之東北。漢魏以來。不通中華。隋大業三年。令羽騎尉朱寬入海訪求異俗。始至其國。言語不通。掠一人以歸。明年。復令寬慰撫琉球。不從。寬取其布甲而環。適倭使來朝。見之。曰。此夷邪。久國人所用也。六年遣

虎賁郎將陳稜等。自義安泛海擊之。東行至高華嶼。又東行二日至龜巖嶼。又一日至其都。琉球王歡斯渴利兜戰敗。稜等乘勝拔其柵。殺其王。虜男女數千人而還。自是歷唐至宋。未嘗朝貢。元至正二十七年。遣使招諭琉球。不至。其國所轄有古米。馬齒。太平等山。東北有硫黃。葉壁。七島諸山。並隔海外。不相屬。明朝洪武五年。遣行人楊載。齊詔往諭其國。率先歸附。太祖獎其忠順。賜符印章服。及閩人之善操舟者三十六姓。又許其遣子及陪臣之子來學於國學。其國分爲三。曰中山。王察度。南山。王承宗。北山。王帕尼芝。皆遣使朝貢。自永樂以來。其國王嗣立。皆受冊封。後惟中山朝貢不絕。其南山。北山。二王俱爲所併。嘉靖三十五年。倭寇琉球。世子尙元。邀擊殲之。萬曆三十七年。薩摩州倭寇琉球。虜其王尙寧。四十年復國。至今其王相仍。皆稱尙氏。貢道自閩縣。

以達於京師。朝廷遣使去以孟夏來以季秋。乘風便也。自福州梅花所開洋。七晝夜可至。自泉州澎湖島開洋。五晝夜可至。望見古米山。卽其境。東去三百里。爲葉壁山。又東卽日本。恆與貿易假貸。近國那霸首里並有馬市。又有雞籠山島野夷。隔雞籠淡水。亦謂之東番。萬歷四十四年。倭夷協取其地。久之始復國。四夷考。琉球之地。僅海外一岡。無大聚落。所居曰婆羅檀閣。無城郭。墜柵三重。環以流水。樹棘爲藩而已。元史志載自澎湖而東。水漸低近琉球者。謂之落際。際者水趨下不回也。嘉靖五年。給事中陳侃使琉球。首辨其妄。國別號大琉球。西南則暹羅。東北則日本。從長樂。广石出海。隱隱一小山浮雲。卽小琉球也。更南則東番諸山。其人盛聚落而無君長。習鑿怒。少舟楫。自昔不通中國。又東隅有夷島。語鬼形。殆非人類。或云卽昆舍那國云。

呂宋

在東南海中。小國也。產黃金。永樂三年朝貢。嘉靖中始復至。與漳泉民相市易。民流寓其地。多至數萬。萬歷中。同安人張巖謬。誅貿易至今不絕。漳郡志云。東洋有呂宋。蘇祿諸國。西洋有暹羅。占城諸國。今東西洋商舶載在令甲者。東洋則呂宋。屋同沙瑤。玳瑁宿霧。文來南旺大港。咄嚙磨老英筆架山。密臘中邦。以寧麻里呂米六合高藥武運。福河。岸塘呂蓬。西洋有下港。暹羅。舊港。交趾。東埔。蔡丁。機宜。順塔。占城。麻六甲。順化。大泥。烏汀。礁林。新州。啞齊。交囉。吧哪。彭西。寧陸。坤占。破高。趾洲。籬木。高提里。鄰吉連。單交。佛吉。寧邦。日隸。安丁。義里。遲悶。蘇祿。班隘。又有雞籠淡水。不係東西洋船數。而紅毛海夷。饒財寶於東西洋。別爲種落。往往舟舶澎湖。溝。姦民爲販鬻。議者謂當與日本特設防禁。杜其亂階云。○俱藍國自古不通中國。元至元十九年入貢。海外諸番。此爲最遠。自泉州至其境。約十萬里。

